

方廣
大莊嚴經

大

C40
4514
51



C 40-4514

子翁上座請大猷及有
家書置之武州黃雲山
我微笑塔院庭中未
為學者不敢許出院內
當山二世鐵牛機謹誌



B 64853

方廣大莊嚴經卷第七

唐中天竺國沙門地婆訶羅奉

詔譯

頻婆娑羅王勸受俗利品第十六

爾時佛告諸比丘車匿奉菩薩教安慰大王及摩訶
波闍波提耶輸陀羅諸釋種等令離憂惱為欲饒益
諸眾生故剗除鬚髮向獵師邊以僑奢耶衣貿易袈
裟清淨法服於是詣鞞留梵志苦行女人所時彼女
人奉請菩薩明日設齋既受請已次往波頭摩梵志
苦行女人所時彼女女人亦請菩薩明日設齋既受請
已復往利婆陀梵行仙人所時彼仙人亦請菩薩明

經

方廣大莊嚴經卷第七

一

四七

日設齋既受請已復往光明調伏二仙人所其仙亦請菩薩明日設齋諸比丘菩薩次第至毗舍離城城傍有仙名阿羅邏與三百弟子俱常爲弟子說無所有處定時彼仙人遙見菩薩心生希有告諸弟子汝等應觀是勝上人諸弟子等白仙人言我見是人形貌端正昔所未有爲從何來比丘我於爾時問阿羅邏言汝所證法可得聞乎今欲修行願爲我說仙言瞿曇我所證法甚深微妙若能學者當爲宣說令得修習若有清信善男子受我教者皆得成就無所有處微妙之定諸比丘我聞仙人所說作是念言我今

自有精進念定樂欲信慧獨在一處常勤修習心無放逸必證彼仙所得之法於是精勤修習心不厭倦經於少時皆已得證旣得定已往仙人所作如是言大仙汝惟證此更有餘法仙言瞿曇我惟得此更無餘法菩薩報言如是之法我已現證仙言以我所證汝亦能證我之與汝宜應共住教授弟子諸比丘是時仙人甚相尊重卽以最上微妙供具供養於我諸學徒中以我一人爲其等侶比丘我時思惟仙人所說非能盡苦何法能爲離苦之因卽於彼時出毗舍離城漸次遊行往摩伽陀國王舍大城入靈鷲山獨

住一處常爲無量百千諸天之所守護晨旦著衣執
持應器從溫泉門入王舍城次第乞食行步詳雅諸
根寂然觀前五肘心無散亂城中諸人見菩薩來心
生希有咸作是言此是何人爲是山神爲是梵王爲
是帝釋爲是四天王耶爾時世尊而說偈言

菩薩清淨身 光明無有量 威儀悉具足
心淨極調柔 處在靈鷲山 自守出家法
於彼晨朝時 著衣持鉢已 調伏身心故
入城而乞食 身如融金聚 相好以莊嚴
路傍若男女 觀者無厭足 城中居民輩

見是勝人來 皆生希有心 奔馳競瞻仰
斯人甚奇特 今從何所來 有諸姝女等
咸昇妙樓閣 於彼牕牖間 窺望不暫捨
街衢盡充滿 闐闐悉虛空 棄捨所作業
俱來候菩薩 有人遽往告 頻婆娑羅王
今有梵天來 入城而乞食 復有作是言
或是天帝釋 夜摩兜率天 化樂他化主
四天及日月 或是羅睺等 鞞留質多羅
薄離諸天衆 復有白王言 此是靈山神
大王應當知 王今獲大利 時王聞此語

心生大喜悅 自陟高樓上 遙觀菩薩身
相好甚端嚴 譬如真金聚 王因勅左右
奉獻菩薩食 并遣尋所住 隨逐而觀之
使者隨菩薩 見往靈鷲山 歸來白大王
具陳所見事 王聞是事已 益增希有心
於彼晨朝時 嚴駕躬親謁 遙觀巖石中
光相極清淨 威容甚嚴好 不動若須彌
屏除諸侍從 徒步而前進 頂禮菩薩足
種種慰問已 而白菩薩言 大士從何來
鄉邑在何處 父母爲是誰 爲是婆羅門

爲是刹帝利 或是諸仙聖 仁者如實說
菩薩答王言 我父輸檀王 居住雪山下
城名迦毗羅 人民甚安樂 爲求無上道
是故今出家 王種稽首言 仁今盛少年
容顏甚端正 應受五欲樂 何爲乃行乞
我當捨此國 與汝共理之 今者幸相見
中心甚欣喜 願得作親友 共莅於王位
何爲樂獨處 空山林野中 菩薩於是時
以柔輦音句 徐答大王言 我今甚不戀
世間諸榮位 欲求寂滅故 捨之而出家

便生大苦惱	若已得之者	而求大苦因	若著五欲者	須臾而變滅	欲如果熟已	餓鬼及畜生	大王應當知	大海為宮室	況乃於王國
天上微妙樂	轉復無厭足	若人未得欲	即失解脫樂	如風駛飄鼓	將墜自不久	智者當遠之	五欲無邊過	豈復於牛跡	而復生貪羨
人中殊勝果	得已愛別離	貪火極熾然	誰有智慧士	無時而暫停	又如空中雲	棄捨如涕唾	能令墮地獄	而生愛著心	譬如婆竭龍

我今勸俗利	我本臣事汝	是故今出家	我雖受五欲	無常不堅固	證無漏聖道	輪轉恒無際	五欲亦如是	得此更求餘	假使世間人
必獲無量罪	汝是帝王子	頻婆娑羅言	而不生貪著	九孔恒流溢	爾乃名知足	若有智慧者	希求無息時	譬如熱乏人	盡受二種報
惟願大慈悲	能棄五欲榮	善哉大導師	為求寂滅樂	眾苦作機關	王今應觀身	心淨攝諸根	常在生死中	渴逼飲鹹水	心亦未知足

哀愍捨我過

當於此境界

證得佛菩提

願使不我遺

我當獲大利

於是從座起

頂禮菩薩足

百千衆圍繞

還返於自宮

菩薩調伏心

爲世間依止

隨益而去住

當往尼連河

苦行品第十七

佛告諸比丘王舍城邊有一仙人摩羅之子名烏特迦與七百弟子俱常說非想非非想定爾時菩薩見彼仙人於大會中多聞聰慧衆所宗仰作是思惟我若不至其所同其苦行云何能顯彼所修行諸定過

失我今方便令彼自知其所修習非爲究竟又欲開顯我之定慧利益一切令彼衆會生希有心發是念已至仙人所作如是言仁者誰爲汝師汝所修行復是何法仙人答言我本無師自然而悟菩薩告言我今故來求汝所證願爲演說我當行之仙言隨意所欲當爲宣說爾時菩薩受彼教已於一靜處專精修學由昔慣習定慧因緣卽得世間百千三昧隨彼諸定所有差別種種行相皆現在前是時菩薩復從定起謂仙人言過此定已更有何法仙言此最爲勝更無餘法菩薩作是思惟我有信進念定慧速能證得

彼仙之法其所得者非爲正路非厭離法非沙門法
非菩提法非涅槃法佛告諸比丘菩薩爲欲令彼諸
仙捨其邪道說如上事時五跋陀羅先於彼所修行
梵行竊相議言我等久學尚未能測彼定淺深云何
太子於少時間已能證得大仙之法嫌未究竟更求
勝者由斯義故必當證獲無上菩提彼得道時我等
五人亦應有分作是念已卽捨仙人還從菩薩爾時
菩薩出王舍城與五跋陀羅次第遊歷向尼連河次
伽耶山於山頂上在一樹下敷草而坐作是思惟世
間若沙門若婆羅門放逸身心住於貪欲隨於熱惱

雖行苦行去道甚遠譬如有人爲求火故便取濕木
置之水中鑽燧索火是人有能求得火不若人住貪
欲等雖行苦行不能證得出世勝智亦復如是復作
是念世間若沙門若婆羅門制御於身不行貪欲於
境界中心猶愛著雖修苦行去道尚遠譬如有人爲
求火故猶取濕木置之陸地鑽燧索火是人有能求
得火不若復有人起貪愛等心未寂靜雖行苦行不
能證得出世勝智亦復如是復作是念世間若沙門
若婆羅門攝衛身心離於貪欲除諸熱惱最上寂靜
修行苦行卽能證得出世勝智譬如有人爲求火故

取彼燥木置於乾地而鑽燧之當知是人定求得火
若復有人不處貪欲身心寂靜勤修苦行卽能證得
出世勝智亦復如是佛告諸比丘菩薩出伽耶山已
次第巡行至優樓頻螺池側東面而視見尼連河其
水清泠湍洄皎潔涯岸平正林木扶疎種種華果鮮
榮可愛河邊村邑處處豐饒棟宇相接人民殷盛爾
時菩薩漸至一處寂靜閑曠無有丘墟非近非遠不
高不下卽作是念今止此地易可安神往古已來修
聖行者多於此住復作是念我今出於五濁惡世見
彼下劣衆生諸外道等著我見者修諸苦行無明所

覆虛妄推求自苦身心用求解脫所謂或有執噐巡
乞而行食之或有惟一掬食以濟一日或不乞食任
彼來施或有不受來請須自往乞以求解脫或有恒
食草木根莖枝葉華果蓮藕獸糞糠汁米泔油滓或
有不食沙糖酥油石蜜醇酒甜醋種種美味以求解
脫或有乞一家食若二若三乃至七家或有一日一
食二日一食乃至半月一月一度而食以求解脫或
有所食漸頓多少隨月增減或有日食一撮乃至七
撮或有日食一麥一麻一米或有惟飲淨水以求解
脫或有名稱神所自餓而死謂隨己意生天人中或

有紡績鷓鴣毛羽以爲衣服或著樹皮或著牛羊皮
革糞掃毳毼或著一衣乃至七衣或黑或赤以爲衣
服或復露形或手提三杖或貫髑髏以求解脫或一
日一浴一日二浴乃至七浴或常不浴或有塗灰或
有塗墨或塗糞土或帶萎華或五熱炙身以煙熏鼻
自墜高巖常翹一足仰觀日月或臥編椽棘刺灰糞
瓦石板杵之上以求解脫或作囁聲婆娑聲蘇陀聲
娑婆訶聲受持呪術諷誦韋陀以求解脫或依諸梵
王帝釋摩醯首羅突伽那羅延拘摩羅迦延摩致
履伽八婆蘇二阿水那毗沙門婆樓那阿履致旃陀

羅乾闥婆阿脩羅迦樓羅摩睺羅伽夜叉步多鳩槃
荼諸天鬼神以求解脫或有歸依地水火風空山川
河池溪壑大海林樹蔓草塚墓四衢養牛之處及鄙
肆間或事刀劍輪稍一切兵器以求解脫是諸外道
怖生死故勤求出離修習苦行都無利益非歸依處
而作歸依非吉祥事生吉祥想佛告諸比丘菩薩爾
時復作是念我今爲欲摧伏外道現希有事令諸天
人生清淨心又欲令彼壞因緣者知業果報又欲示
現功德智慧有大威神分析諸定差別之相又欲示
現有大勇猛精進之力便於是處結跏趺坐身口意

業靜然不動初攝心時專精一境制出入息熱氣偏
體腋下流汗額上津出譬如雨滴忍受斯苦不生疲
極便起勇猛精進之心佛告諸比丘菩薩爾時制出
入息於兩耳中發大音響譬如引風吹鼓鞞囊受是
苦事不生疲倦諸比丘我於爾時耳鼻口中斷出入
息內風衝頂發大音聲譬如壯士揮彼利刃上破腦
骨受是苦事不生疲倦退轉之心佛告諸比丘菩薩
爾時諸出入息一切皆止內風強盛於兩肋間旋迴
宛轉發大聲響譬如屠人以刀解牛受是苦事都無
懈倦佛告諸比丘菩薩爾時內風動故遍身熱惱譬

如有人力弱受制於大火聚舉身被灸受斯苦極更
增勇猛精進之心作是念言我今住彼不動三昧身
口意業皆得正受入第四禪遠離喜樂遣於分別無
有飄動猶如虛空遍於一切無能變異此定名爲阿
娑婆那菩薩爾時修如是等最極苦行諸比丘菩薩
復作是念世間若沙門婆羅門以斷食法而爲苦者
我今復欲降伏彼故日食一麥比丘當知我昔惟食
一麥之時身體羸瘦如阿斯樹肉盡筋現如壞屋椽
脊骨連露如筇竹節眼目瞋陷如井底星頭頂銷枯
如曝乾瓠所坐之地如馬蹄跡皮膚皺皴如割句形

總
大藏
經
卷
一
一
四
一
舉手拂塵身毛焦落以手摩腹乃觸春梁又食一米
乃至一麻身體羸瘦過前十倍色如聚墨又若死灰
四方聚落人來見者咸歎恨言釋種太子寧自苦爲
端正美色今何所在佛告諸比丘菩薩六年苦行之
時於四威儀曾不失壞盛夏暑熱不就清涼隆冬嚴
寒不求厚煖蚊蟲咬體亦不拂除結跏趺坐身心不
動亦不頻申亦不涕唾放牧童豎常來覩見戲以草
莛而刺我鼻或刺我口或刺我耳我於爾時身心不
動常爲天龍鬼神之所供養能令十二浴又天人住
三乘路爾時世尊欲重宣此義而說偈言

菩薩於往昔	捨位出家已	爲利衆生故
思惟諸方便	我出濁惡世	生此閻浮提
多諸邪見人	破法行異道	愚者求解脫
自苦其身心	雖怖生死因	恒迷出離果
或有赴火聚	自墜於高巖	五熱以炙身
塗灰而自毀	日常一掬食	劣以濟身命
乞食於他門	主喜而方受	顏色少懷悵
終朝而不食	或時聞杵曰	及以狗吠聲
卽止不行乞	乃喚亦不受	酥油及美味
乳酪沙糖等	一切皆不御	惟食麤惡食

糠汁及油滓 獸糞并藕根 草木諸華葉
以求於解脫 或有服淨水 或日食一麻
或止進一米 或有自餓死 以求於解脫
或有著皮革 糞掃及鳥羽 樹皮毛毼等
種種弊衣服 或有著一衣 乃至著七衣
或有常露形 以求於解脫 坐臥編椽上
棘刺灰土中 板杵瓦石間 以求於解脫
或常舉兩手 或有翹一足 散髮及鬚髻
逐日而廻轉 以求於解脫 或常禮日月
河海及山川 高原諸樹林 以求於解脫

此諸外道等 勤修無利苦 執著虛妄業
堅受未嘗捨 如是邪見人 死當墮惡趣
我爲如是等 昔於六年中 示現摧伏彼
勤修大苦行 有諸無智人 見外道邪苦
竊以爲真法 便生隨喜心 亦爲成熟彼
勤行大苦行 乃擇空閑地 跏趺坐三昧
當是節食時 日食一麻米 履寒不就煖
處熱不求涼 亦不逐蚊蟲 亦不避風雨
童牧來觀看 戲以草蓬刺 通於耳鼻口
以草木瓦石 打擲於我身 亦不能致損

一切皆忍受 身亦不低昂 亦不生疲極
涕唾便利等 諸穢皆已絕 惟餘皮骨在
血肉盡乾枯 形體極羸瘦 如阿斯迦樹
住阿那婆定 身心寂不動 亦不味禪樂
而起大悲心 普爲諸衆生 修行如是定
以修此定故 速疾得成佛 滅除外道衆
摧伏諸異學 亦以迦葉等 不信有菩提
如是大菩提 無量劫難得 爲是諸人等
入阿那婆定 當坐此定時 有十二洛叉
諸天人衆等 住於三乘路 諸天龍神等

恒於日夜中 供養菩薩身 各自發弘誓
願住那婆定 利益諸衆生 其心如虛空
往尼連河品第十八

佛告諸比丘爾時菩薩六年苦行魔王波旬常隨菩薩
伺求其過而不能得生厭倦心悒然而退爾時世
尊以偈頌曰

菩薩之所居 林野甚清淨 東望尼連水
西據頻螺池 初起精進心 來求寂靜地
見彼極閑曠 止此除煩惱 時魔王波旬
到於菩薩所 詐以柔輓語 而向菩薩言

世間諸衆生 皆悉愛壽命 汝令體枯竭
千死無一全 當修事佛法 必獲大果報
無宜徒捨命 爲人所憐愍 心性本難伏
煩惱不可斷 菩提誰能證 自苦欲何爲
菩薩告波旬 而作如是言 昏醉貪瞋癡
與汝爲眷屬 將汝至於此 共汝壞善根
我不求世福 勿以此相擾 我今無死畏
以死爲邊際 志願求解脫 決無退轉心
雖有諸痛惱 我心恒寂靜 住斯堅固定
精進樂欲等 我寧守智死 不以無智生

譬如義勇人 寧爲決勝沒 非如怯弱者
求活爲人制 是故我於今 當摧汝軍衆
第一貪欲軍 第二憂愁軍 第三饑渴軍
第四愛染軍 第五昏睡軍 第六恐怖軍
第七疑悔軍 第八忿覆軍 第九悲惱軍
及自讚毀他 邪稱供養等 如是諸軍衆
是汝之眷屬 能摧伏天人 我今恒住彼
正念正知等 銷滅汝波旬 如水漬坏器
菩薩作是言 魔王便退屈

佛告諸比丘菩薩作是思惟過現未來所有沙門若

婆羅門修苦行時逼迫身心受痛惱者應知是等但
自苦已都無利益復作是念我今行此最極之苦而
不能證出世勝智卽知苦行非菩提因亦非知苦斷
集證滅修道必有餘法當得斷除生老病死復作是
念我昔於父王園中閻浮樹下修得初禪我於爾時
身心悅樂如是乃至證得四禪思惟往昔曾證得者
是菩提因必能除滅生老病死菩薩復作是念我今
將此羸瘦之身不堪受道若我卽以神力及智慧力
令身平復向菩提場豈不能辦如是之事卽非哀愍
一切衆生又非諸佛證菩提法是故我今應受美食

令身有力方能往詣菩提之場時有諸天心常愛樂
修苦行者已知菩薩欲食美食白菩薩言尊者莫受
美食我今方便以神通力令尊氣力平復如本與食
無異菩薩思惟我實不食已經多時四輩人民亦皆
知我修行苦行若我因彼天神之力而不食者便成
妄語時五跋陀羅旣聞菩薩欲受美食咸作是念沙
門瞿曇如是苦行尚不能得出世勝智況復今者欲
食美食受樂而住是無智人退失禪定便捨菩薩詣
波羅奈仙人墮處鹿野苑中佛告諸比丘菩薩苦行
已來優樓頻螺聚落主名曰斯那鉢底有十童女昔

與五跋陀羅常以麻麥供養菩薩爾時諸女既知菩薩捨致苦行卽作種種飲食奉獻未經多日色相光悅於是衆人復相謂言沙門瞿曇形貌威嚴有大福德十童女中其最小者名曰善生昔於菩薩苦行之時恒以飲食供養八百梵志願因供養梵志之福資益菩薩令速成就阿耨多羅三藐三菩提佛告諸比丘菩薩復作是念六年勤苦衣服弊壞於尸陀林下見有故破糞掃之衣將欲取之於時地神告虛空神作如是言奇哉奇哉釋種太子捨輪王位捨是所棄糞掃之衣虛空之神聞此語已告三十三天如是展

轉於一念中乃至傳聞阿迦尼吒天爾時菩薩手持故衣作如是言何處有水洗浣是衣時有一天於菩薩前以手指地便成一池爾時菩薩復更思惟何處有石可以洗是糞掃之衣時釋提桓因卽以方石安處池中菩薩見石持用浣衣爾時帝釋白菩薩言我當爲尊洗此故衣惟願聽許然菩薩欲使將來諸比丘衆不令他人洗浣故衣卽便自洗不與帝釋浣衣已訖入池澡浴是時魔王波旬變其池岸極令高峻池邊有樹名阿斯那是時樹神按樹令低菩薩攀枝得上河岸於彼樹下自納故衣時淨居天子名無垢

光將沙門應量袈裟供養菩薩爾時菩薩受袈裟已於晨朝時著僧伽梨入村乞食其聚落神於昨夜中告善生言汝常爲彼清淨之人設大施會彼人今者捨苦行已現食美食汝先發願彼人受我食已速得阿耨多羅三藐三菩提今正是時速宜營辦時善生女聞神語已卽取千頭特牛而犖其乳七度煎煮唯取其上極精純者置新器內用香秬米煮以爲糜當煮之時於乳糜上現千輻輪波頭摩等吉祥之相時善生女見此相已卽自思惟是何瑞應時有仙人語善生言如此乳糜若有食者必當得成無上菩提是

時善生煮乳糜已灑掃所居極令清淨安置妙座種種施設告優多羅女言汝宜往請梵志皆來優多羅女旣奉命已向東而行唯見菩薩不覩梵志南西北行但覩菩薩不見梵志亦復如是由淨居天隱梵志身令優多羅女永不得見優多羅女歸白善生言我所去處惟見沙門瞿曇不復見有諸餘梵志善生女言此爲最勝我故爲彼辦是乳糜汝宜速往爲我延請優多羅女至菩薩所頭面禮足作如是言善生使我來請聖者菩薩聞已往詣其所坐殊勝座時善生女卽以金鉢盛滿乳糜持以奉獻菩薩受已作是思

惟食此乳糜必定得成阿耨多羅三藐三菩提復告
善生我若食已如是金鉢當付與誰善生女言願以
此鉢奉上尊者隨意所用爾時菩薩擊彼乳糜出優
樓頻螺聚落往尼連河置鉢岸上剃除鬚髮入河而
浴佛告諸比丘菩薩澡浴之時百千諸天散天香華
遍滿河中菩薩浴竟收此水將還天宮所剃鬚髮
善生得已起塔供養菩薩既出河岸作是思惟當以
何座食此美味河中龍妃卽持賢座從地涌出敷置
淨處請菩薩坐菩薩坐已食彼乳糜身體相好平復
如本卽以金鉢擲致河中是時龍王生大歡喜收取

金鉢官中供養時釋提桓因卽變其形爲金翅鳥從
彼龍王奪取金鉢將還本宮起塔供養爾時菩薩從
座而起龍妃還持所獻賢座歸於本宮起塔供養諸
比丘由菩薩福慧力故食乳糜已三十二相八十種
好圓光一尋轉增赫弈爾時世尊欲重宣此義而說
偈言

六年苦行時	身體極羸瘦	不以天神力
往彼菩提場	爲愍衆生故	還依諸佛法
須食於美食	方證大菩提	有女於往昔
行善名善生	爲佛六年苦	廣施八百衆

吳江居士沈珣捐貲刻此
方廣大莊嚴經卷第七 計字六千六百七十
六箇 該銀三兩三錢三分八厘 伏願
六根雪淨三障冰清即生啓悟妙心世世弘開
道眼 虞山釋契機對
崇禎四年孟冬月徑山化城寺識

方廣大莊嚴經卷第八

唐中天竺國沙門地婆訶羅奉 詔譯

請菩提場品第十九

爾時佛告諸比丘菩薩澡浴身體復食乳糜氣力平
全方欲徃詣十六功德之地菩提樹下爲欲降伏彼
魔怨故以大人相四面而行所爲徐徐安隱而行容
止美好如虹蜺而行雅步閑詳如須彌山巍巍而行
不忽遽行不遲慢行不沉重行不輕躁行不濁亂行
離垢而行清淨而行無過失行無愚癡行無染著行
如師子王行如龍王行如那羅延行不觸地行千輻

經 卷八 四八

輪相印文而行足指網縵甲如赤銅照地而行震動
大地而行如山相擊出大音聲而行坑坎堆阜自然
平正而行足下光明照罪衆生歸於善趣而行所踐
之地皆生蓮華而行隨順過去諸佛就師子座而行
心如金剛不可沮壞而行閉諸惡趣開諸善門而行
安樂一切衆生而行銷滅魔力而行摧諸邪論而行
除斷無明瞽障而行絕生死翅羽而行映蔽釋梵護
世自在天王而行於三千大千世界惟我獨尊而行
自證聖道不由他悟而行將證一切智而行念慧相
應而行欲除生老病死而行方趣寂滅離垢不生無

畏向涅槃城而行爾時菩薩正念向彼菩提之樹直
視行時便有如是無量威儀時有風天雨天從尼連
河至菩提樹周遍掃灑盡令嚴淨又雨無量殊勝香
華遍覆其地於三千大千世界所有大小諸樹皆悉
低枝向菩提樹三千大千世界須彌山等大小諸山
皆悉低峯向菩提樹欲界諸天子等各散種種微妙
香華一一妙華縱廣一拘盧舍以爲華臺復現廣路
修遠無際於路左右七寶欄楯皆悉嚴好其量高下
如七多羅樹衆寶旛蓋處處莊嚴復化七寶多羅之
樹一一樹間絡以金繩於其繩上皆懸珍鐸明珠留

琉璃間廁其中其樹兩間有七寶池於彼池內金沙遍
布香水盈滿優鉢羅華拘物頭華波頭摩華芬陀利
華如是等華充滿池中其池四邊七寶階道周而莊
嚴於其階道則有迦陵頻伽鳧鴛鴦命諸鳥出
和雅音有八萬四千天諸姝女以衆香水灑於前路
復有八萬四千天諸姝女散衆天華一一樹下復有
衆寶妙臺是諸臺上各有八萬四千天諸姝女皆捧
寶器盛妙栴檀沉水之香復有五千天諸姝女奏天
妓樂歌舞頌歎出和雅音佛告諸比丘菩薩詣菩提
樹時其身普放無量光明又遍震動無邊刹土復有

無量百千諸天奏天妓樂於虛空中雨衆天華又雨
無量百千天妙衣服復有無量象馬牛等圍遶菩薩
發聲哮吼其音和暢又有無量鸚鵡舍利拘枳羅烏
迦陵頻伽鳧鴛鴦孔雀翡翠共命諸鳥翻翔圍遶
出和雅音菩薩往菩提場時有如是等無量希有吉
祥之相佛告諸比丘菩薩將欲坐菩提座其夜三千
大千世界主大梵天王告諸梵衆作如是言仁者當
知菩薩摩訶薩被精進甲智慧堅固心不劬勞成就
一切菩薩之行通達一切波羅蜜門於一切菩薩地
得大自在獲諸菩薩清淨意樂一切衆生諸根利鈍

皆悉了知住於如來祕密之藏超諸魔境一切善法皆能自覺不由他人而得覺悟爲諸如來大神通力之所護念當爲衆生說解脫道亦爲衆生作大商主摧伏一切諸魔軍衆於三千大千世界之中惟佛獨尊爲大醫王調和法藥救衆生苦爲大法王以智慧明照於十方建大法幢不爲世間八法所染猶如蓮華不著於水能積無量眞實法寶猶如大海蘊諸奇珍怨親平等如須彌山安住不動心意清淨如摩尼珠離諸垢穢於三千大千世界得大自在菩薩摩訶薩以如是等無量功德詣菩提場爲欲降伏衆魔怨

故成阿耨多羅三藐三菩提故欲圓滿十力四無所畏十八不共佛法故轉正法輪故爲欲震大師子吼故施大法雨令諸衆生得滿足故令諸衆生得清淨法眼故令諸外道息諍論故欲使本願得圓滿故於一切法得自在故仁者汝等應當發心往詣親近供養卽說偈言

無量百千劫	具慈悲喜捨	禪定智慧通
於今證涅槃	若欲遠三惡	及離於八難
受天妙樂報	乃至得涅槃	應持上供具
供養於菩薩	六年修苦行	欲詣菩提場

三千世界主 釋梵及日月 一切無與等

見者咸歡悅 降伏諸魔軍 必當成正覺

身相三十二 最勝自莊嚴 梵音甚清徹

心淨離諸過 或有人樂欲 上生於梵世

或有人樂欲 證得聲聞果 或有人樂欲

得成辟支佛 或有人樂欲 當獲無上果

如是諸人等 應供養導師

佛告諸比丘時大梵天王爲供養菩薩故以神通力
令三千大千世界皆悉清淨除諸砂鹵瓦礫荆棘地
平如掌無有丘墟以金銀瑠璃砗磲碼碼珊瑚琥珀

真珠等寶而嚴飾之又遍三千大千世界生諸瑞草
青綠右旋柔輒可愛如迦隣陀衣又諸巨海變爲平
地亦不燒彼魚鼈鼉水性之屬所有十方刹土梵
天帝釋護世四王咸見此間三千大千世界如是嚴
淨各於本土皆悉莊嚴進申供養又十方無邊刹土
一切菩薩爲供養故以超過人天殊勝供具各於本
國而申供養皆見無邊世界如一佛土諸須彌山鐵
圍山間幽冥之處日月威光所不能及咸見菩薩光
明普照有十六天子守護此菩提之場是諸天子皆
證無生法忍及得阿惟越致其名曰轉進天子無勝

天子施與天子愛敬天子勇力天子善住天子持地
天子作光天子無垢天子法自在天子法幢天子所
行吉祥天子無障礙天子大莊嚴天子清淨戒香天
子蓮華光明天子如是等天子各化四方八十由旬
廣設無量寶莊嚴具其地四邊皆有七重寶路一一
寶路皆悉行列寶多羅樹一一樹間金繩交絡垂諸
寶鈴覆以寶網間浮檀金以爲蓮華遍滿於地一一
華上各以七寶而嚴飾之復燒種種上妙天香十方
世界人天之中所有妙樹悉於中現又十方世界一
切水陸勝妙香華悉於中現又十方世界諸佛菩薩

各於本土現無量資糧廣博嚴飾福德智慧菩提道
場如是種種事業皆悉現於此道場中佛告諸比丘
十六天子見如是等神通瑞相種種莊嚴踊躍歡喜
天龍夜叉乾闥婆阿脩羅迦樓羅緊那羅摩睺羅伽
等見此道場歎未曾有各想自宮猶如塚墓皆有無
量讚述功德復有四護菩提樹神一名毗留薄瞿二
名蘇摩那三名烏殊鉢底四名帝殊各以神力變菩
提樹高廣嚴好各長八十多羅之樹根莖枝葉華果
茂盛端正可愛莊嚴無比見者歡喜逾於帝釋歡喜
園中波利質多羅樹拘鞞羅樹菩薩所坐成菩提處

則三千大千世界之中心也此樹下地純以金剛所成不可沮壞佛告諸比丘菩薩欲往菩提樹時放大光明遍照無邊無量世界地獄衆生皆得離苦餓鬼衆生皆得飽滿畜生衆生慈心相向諸根不具衆生皆得具足病苦衆生皆得痊愈怖畏衆生皆得安樂獄囚衆生皆得釋然貧窮衆生皆得財寶煩惱衆生皆得解脫饑渴衆生皆得飲食懷孕衆生皆得免難羸瘦衆生皆得充健而於此時無一衆生爲貪恚癡之所逼惱人天不死亦不受胎是時一切衆生更相慈愍生利益心如父如母如姊如妹如兄如弟爾時

世尊欲重宣此義而說偈言

地獄痛苦逼	一切皆休息	畜生相食噉
各各起慈心	八難皆閉塞	三惡悉空靜
光明所照處	咸受微妙樂	眼耳鼻舌等
諸根不完具	皆悉得具足	煩惱所擾者
便得大安樂	狂亂得正念	貧賤得富貴
病苦得痊除	禁囚得解脫	一切無忿競
展轉起慈心	如父母愛子	菩薩光明網
遍滿於十方	普照恒沙界	映蔽無邊土
鐵圍大鐵圍	及餘諸山等	皆悉不復現

變爲一佛刹 以衆寶所成 嚴飾甚微妙
由光照燭故 一切如觀掌 如是等莊嚴
爲供養菩薩 護菩提塲神 有十六天子
面八十由旬 現種種嚴飾 菩薩大威力
面八十由旬 亦現無邊刹 各各皆嚴淨
天龍八部衆 觀如是事已 還自思本宮
而生塚墓想 咸起竒特心 頌歎諸功德
善哉福難思 乃感如斯果 匪惟身語意
起如是莊嚴 以本願力故 一切皆成就
隨諸衆生業 皆悉得滿足 四護菩提神

嚴飾菩提樹 勝過歡喜園 帝釋殊妙林
此神所嚴飾 端正甚可愛 一切天人等
稱讚無窮已

佛告諸比丘菩薩清淨光明普照世界滅除一切衆
生煩惱遇斯光者皆生欣喜此光又照迦利龍王宮
時彼龍王遇斯光明於龍衆中而說偈言

過去三佛皆已現 智慧光明真金色
於是還觀無垢光 由斯定有佛與世
其光清淨逾日月 非螢非燭星電等
亦非梵釋阿脩羅 一切威光所能及

我以先業行不善 所處宮殿常昏暗
恒雨熱沙以燒身 自念長時受斯苦
忽遇光明如日照 身心清涼遍歡喜
億劫修行衆行者 今時定坐菩提塲
我與汝等諸親眷 衣服香華并妓樂
及以種種莊嚴具 供養利益世間者
佛告諸比丘龍王爾時與其眷屬歡喜踊躍瞻顧四
方乃見菩薩身相巍巍如須彌山梵釋四王龍神八
部皆悉圍遶心大歡喜頭面禮足恭敬尊重卽以種
種香華衣服瓔珞作衆妓樂供養菩薩合掌曲躬以

偈讚曰

面淨似滿月 世間八導師 我昔值諸佛
瑞相皆如是 今尊妙魔已 行當證菩提
曾於過去劫 廣修內外施 持戒及忍辱
精進禪智慧 方便大慈悲 願力喜捨等
以是諸功德 當得成佛道 一切諸叢林
低枝禮佛樹 有千吉祥瓶 圍遶在虛空
衆鳥吐和音 翻翔競隨逐 身光真金色
遍照於十方 惡趣停苦惱 世間蒙快樂
尊今於三界 定爲大導師 梵王及帝釋

欲色諸天子 咸捨微妙樂 皆來申供養
尊今於世間 必爲大醫王 凡是所遊踐
蓮華隨步起 尊今於世間 必爲應供者
導師坐道場 無量拘胝數 一切魔軍衆
皆當自摧伏 日月可墮落 須彌可崩壞
若未得菩提 終不可移動 願我與眷屬
得捨此龍身 功德自莊嚴 當往菩提座
說是偈已其龍王妃名曰金光與無量龍女恭敬圍
遶將衆寶蓋衣服瓔珞人天妙華復持寶器盛衆名
香奏諸妓樂說是妙偈讚菩薩曰

能斷貪瞋癡	世間諸過患	度生死海者
故我今頂禮	尊爲大醫王	善拔煩惱箭
衆生未調伏	而當調伏之	衆生處世間
恒爲煩惱覆	尊當以慧日	照之令得除
世間無依怙	今當得依怙	而於虛空中
雨種種衣食	諸天龍神等	皆生歡喜心
辨才大導師	願速坐道場	降伏衆魔怨
當成無上道	似昔諸如來	所證菩提法
無量劫修習	利益諸羣生	願速坐道場
證無上菩提		

佛告諸比丘菩薩爾時作是思惟古昔諸佛坐於何座證阿耨多羅三藐三菩提作是念時卽知過去諸佛皆坐淨草而成正覺是時淨居天子知菩薩心白菩薩言如是如是過去諸佛欲證菩提皆坐淨草爾時菩薩復自思惟誰能與我如是淨草時釋提桓因卽變其身爲刈草人在菩薩右不近不遠持草而立其草青紺如孔雀尾柔輒可愛如迦尸迦衣宛轉右旋香氣芬馥爾時菩薩旣見化人執斯妙草漸向其所徐而問之汝名字誰其人答曰我名吉祥菩薩思惟我今欲求自身吉祥復欲令他而得吉祥人名吉祥

祥於我前立我今定證阿耨多羅三藐三菩提爾時菩薩欲從化人而求淨草出是語時梵聲微妙所謂眞實聲周正聲清亮聲和潤聲流美聲善導聲不蹇聲不澀聲不破聲柔輒聲惓雅聲分析聲順耳聲合意聲如迦陵頻伽聲如命命鳥聲如殷雷聲如海波聲如山崩聲如天讚聲如梵天聲如師子聲如龍王聲如象王聲不急疾聲不遲緩聲解脫之聲無染著聲依義之聲應時之聲宣說八千萬億法門之聲順一切諸佛法聲菩薩以此美妙之聲語化人言仁者汝能與我淨草以不於是頌曰

吉祥汝今時 宜速施淨草 我當坐是草
降伏彼魔軍 若證寂滅法 卽得無上道
我爲菩提故 無量劫修行 施戒精進忍
禪定智慧力 解脫與意樂 福德及神通
緣彼諸行故 今得圓滿果 若施我淨草
獲無量福德 因施淨草故 必當成導師
吉祥聞此言 心生大歡喜 手持淨妙草
住於菩薩前 卽以歡喜心 而白菩薩言
若以施草故 能獲大菩提 幸先授菩提
然後受淨草 菩薩報吉祥 非唯施淨草

卽獲大菩提 應修無量德 方蒙諸佛記
吉祥汝應知 菩提不妄授 菩提可妄授
我當以菩提 授一切衆生 吉祥汝應知
我證菩提已 分布諸世間 汝當於我所
聽受甘露法 菩提受淨草 往詣菩提場
舉足欲行時 其地大振動 諸天龍神等
皆生歡喜心 恭敬合掌言 菩薩於今者
必降伏衆魔 定獲甘露法 證於無上道
佛告諸比丘菩薩向菩提場時無量菩薩并諸天衆
各各莊飾菩提之樹其菩提樹有八萬四千一一皆

願菩薩坐其樹下得阿耨多羅三藐三菩提其菩提
樹或有高顯殊特百千由旬純華所成或有菩提樹
高顯殊特二億由旬純香所成或有菩提樹高顯殊
特百千由旬純以栴檀所成或有菩提樹高顯殊特
五億由旬純以繒綵所成或有菩提樹高顯殊特十
億由旬純以珠寶所成或有菩提樹高顯殊特百億
由旬純以七寶所成如是八萬四千菩提之樹一一
樹下各隨色類敷師子座或有師子之座以華莊嚴
或有師子之座以香莊嚴或有師子之座以栴檀莊
嚴或有師子之座以珠寶莊嚴或有師子之座以雜
寶莊嚴佛告諸比丘爾時菩薩示現取草周遍敷設
如師子王具足勢力精進堅固無諸過失貴盛自在
智慧覺悟有大名稱降伏衆魔摧諸外道具足如是
種種功德將證菩提而面向東於淨草上結跏趺坐
端正正念發大誓言

我今若不證 無上大菩提 寧可碎是身
終不起此座

爾時菩薩昇菩提座卽證方廣神通遊戲大嚴之定
得是定已現身各各坐彼師子之座一一身上皆具
衆妙相好莊嚴其餘菩薩并諸天人各各皆謂菩薩

獨坐其座又由定力能令地獄餓鬼畜生閻羅王界
及諸人天皆見菩薩坐菩提座

嚴菩提場品第二十

佛告諸比丘爾時菩薩坐菩提場六欲諸天恐有障
難卽於東面恭敬而住如是南西北方四維上下皆
有無量諸天恭敬而住是時菩薩放大光明其光名
爲開發菩薩智周遍照曜盡虛空界一切十方諸佛
刹土爾時東方世界有國名離垢其佛號曰離垢光
明彼有菩薩摩訶薩名遊戲莊嚴遇斯光已與無央
數菩薩圍遶而來詣菩提場爲供養故住菩薩前爾

時菩薩以神通力變現十方盡虛空界一切佛刹成
一清淨瑠璃道場一切佛刹五道衆生展轉指示各
相謂言此是何人神通遊戲莊嚴威德色相乃爾是
時菩薩於一一衆生前現化菩薩而說頌曰

能斷諸垢濁 貪瞋癡習氣 身照十方刹

映蔽衆光明 福智及三昧 積劫轉增長

一切諸莊嚴 最勝牟尼力

爾時南方世界有國名寶莊嚴其佛號曰光明彼有
菩薩摩訶薩名現實蓋遇斯光已與無央數菩薩圍
遶而來詣菩提場爲供養故住菩薩前爾時菩薩以

神通力持一寶蓋周遍覆此菩提之場大梵天王釋
提桓因護世四王更相謂言以何果報而現如此寶
莊嚴蓋於寶蓋中出妙頌曰

在昔億千劫 供養三世佛 慈心行捨施
故得相莊嚴 成就那延力 導師感是報
利益於一切 端坐菩提場

爾時西方世界有國名詹波其佛號曰開敷華王智
慧神通彼有菩薩摩訶薩名曰寶網遇斯光已與無
央數菩薩圍遶而來詣菩提場爲供養故住菩薩前
爾時菩薩以神通力取一勝妙寶網彌覆菩提道場

十方諸來天衆龍神八部更相謂言以何因緣感斯
寶網於寶網中出妙頌曰

能爲衆寶因 衆寶所依處 三界皆歸趣
名聞遍十方 欲證大菩提 住於清淨法
精進力成佛 能感如斯供

爾時北方世界有國名日轉其佛號曰掩蔽日月光
彼有菩薩摩訶薩名莊嚴王遇斯光已與無央數菩
薩圍遶而來詣菩提場爲供養故住菩薩前爾時菩
薩以神通力令十方無邊刹土功德莊嚴之臺皆現
於此菩提道場諸來衆會心生竒特一切人天更相

謂言以何因緣感此殊勝莊嚴妙臺於妙臺中出妙
頌曰

由昔無邊劫 福智資糧滿 身口意清淨

慙媿及慈悲 無上能仁尊 衆善無不具

今坐菩提座 故獲如斯福

爾時東南方世界有國名德王佛號功德光明王彼
有菩薩摩訶薩名功德慧遇斯光已與無央數菩薩
圍遶而來詣菩提場爲供養故住菩薩前爾時菩薩
以神通力化作無量功德莊嚴衆寶樓觀諸來天龍
夜叉等衆見未曾有生竒特心更相謂言以何因緣

而有斯瑞於樓觀中而說頌曰

衆德之所生 具足功德者 能成就功德

天龍咸恭敬 德海詣道場 功德香普熏

今坐菩提座 感如斯供養

爾時西南方有國名出寶其佛號寶幢彼有菩薩摩
訶薩名出衆寶遇斯光已與無央數菩薩圍遶而來
詣菩提場爲供養故住菩薩前爾時菩薩以神通力
化作無量阿僧祇衆寶圓光其中諸天見未曾有生
竒特心更相謂言以何威力而現如是衆寶圓光其
圓光中出妙頌曰

以衆寶宮殿 萃果與園林 頭目髓腦等

身肉及手足 如是種種施 積習諸功德

今現證菩提 感如斯供養

爾時西北方世界有國名雲其佛號曰雲王彼有菩薩摩訶薩名雲雷震聲遇斯光已與無央數菩薩圍遶而來詣菩提場爲供養故住菩薩前爾時菩薩以神通力化作沉水香雲及栴檀香雲遍布菩提道場諸天衆會皆生歡喜奇特之心共相謂言以何因緣有斯瑞應其香雲中出妙頌曰
法雲覆一切 普雨於法雨 滅衆生煩惱

令得於涅槃 神通定根力 功德爲莊嚴

證甘露菩提 故獲如斯供

爾時東北方世界有國名金網其佛號寶蓋光明彼有菩薩摩訶薩名金網莊嚴遇斯光已與無央數菩薩圍遶而來詣菩提場爲供養故住菩薩前爾時菩薩以神通力於彼諸來菩薩供養其中化出無量無邊大菩薩衆皆有殊勝三十二相莊嚴其身執持華鬘曲躬稽首一一菩薩以偈頌曰

由昔無邊劫 深信極尊敬 以微妙音聲

讚歎諸如來 今坐菩提座 是故我頂禮

願以讚歎業 當得無上果

爾時下方世界有國名普觀其佛號曰普見彼有菩薩摩訶薩名曰寶藏遇斯光已與無央數菩薩圍遶而來詣菩提場爲供養故住菩薩前爾時菩薩以神通力於一一菩薩前化出廣大妙金蓮華而於華中皆有姝女出現半身端正殊妙咸以寶莊嚴具嚴飾其身手執種種金珠瓔珞曲躬稽首而諸人天更相謂言以何因緣感得如是微妙姝女是諸姝女以偈頌曰

由昔無邊劫 頂禮諸如來 辟支及聲聞

父母并尊者 質直無過忌 具一切功德

皆應恭敬禮 清淨戒圓滿

爾時上方世界有國名殊勝功德其佛號曰德王彼有菩薩摩訶薩名虛空藏遇斯光已與無央數菩薩圍遶來詣菩提道場爲供養故住菩薩前爾時菩薩以神通力於虛空中普雨十方世界諸佛刹土昔所不見昔所未聞衆寶華鬘塗香末香燒香繒綵衣服幢旛寶蓋摩尼衆寶金銀瑠璃磚磔碼碯象馬車乘輦輿兵衆華樹果樹童男童女爾時梵釋護世天龍夜叉乾闥婆阿脩羅緊那羅摩睺羅伽人非人等一

切羣生皆悉得見生歡喜心無有驚怖爾時世尊欲
宣此義而說偈言

利益一切世間者 欲證無上菩提時
十方無量諸菩薩 皆悉如雲而集會
彼諸菩薩所來事 我今以喻而略說
無量菩薩從空來 猶如密雲震吼聲
各各執持寶瓔珞 明珠垂懸甚嚴飾
無量菩薩從空來 首飾寶冠垂辮髮
擎捧如傘妙臺觀 而至菩提道場所
無量菩薩從空來 猶如師子振吼聲

說空無相及無願 而至菩提道場所
無量菩薩從空來 猶如牛王哮吼聲
雨未曾有微妙華 而至菩提道場所
無量菩薩從空來 美聲猶如孔雀王
身光出現千種相 而至菩提道場所
無量菩薩從空來 光明猶如淨滿月
以妙音聲而讚歎 菩薩無量諸功德
無量菩薩從空來 光明照耀猶如日
映蔽一切魔宮殿 而至菩提道場所
無量菩薩從空來 身色美豔如虹蜺

福慧資糧悉圓滿

而至菩提道場所

無量菩薩從空來

手出摩尼衆寶網

并散曼陀蘇曼陀

婆利師華簷波華

及持如是等華鬘

而至菩提道場所

無量菩薩從空來

以神通力振大地

而諸衆生不驚怖

一切靡不歡喜者

無量菩薩從空來

手接須彌大山王

如持華鬘不爲重

而至菩提道場所

無量菩薩從空來

頂戴四大香水海

遍灑大地皆嚴淨

而至菩提道場所

無量菩薩從空來

各持殊勝衆寶蓋

令諸菩薩皆覩見

而至菩提道場所

無量菩薩從空來

現爲梵王住寂定

一一毛孔演妙法

說大慈悲及喜捨

無量菩薩從空來

示爲帝釋微妙形

一切天人共圍遶

而至菩提道場所

無量菩薩從空來

示爲護世之形像

一切天人共圍遶

各各散以天華香

以緊那羅乾闥婆

美妙音聲讚菩薩

無量菩薩從空來

各持芬香妙華樹

枝葉華果遍莊嚴 而至菩提道場所
其樹華臺有菩薩 於彼華中出半身
悉皆具相三十二 各各執持諸妙華
拘物頭華波頭摩 優鉢羅華芬陀利
無量菩薩從空來 手持清淨蓮華沼
其身廣大如須彌 變爲淨妙諸華鬘
遍覆三千大千界 而至菩提道場所
無量菩薩從空來 各於眼中現劫燒
而復於此示成劫 遍身一一支節中
演出無邊諸佛法 所有衆生皆得聞

聞者悉斷諸貪欲 而至菩提道場所
無量菩薩從空來 其身端正甚可愛
以衆寶具而莊嚴 其身猶如緊那羅
一切天人脩羅等 見聞皆悉無厭足
無量菩薩從空來 其身堅固如金剛
振動大地至水際 而至菩提道場所
無量菩薩從空來 光明照耀如日月
滅除衆生煩惱苦 而至菩提道場所
無量菩薩從空來 其身皆是衆寶成
遍於無邊佛刹土 普雨雜寶妙華香

一切衆生悉歡喜

而至菩提道場所

無量菩薩從空來

各能總持四種藏

其身一一毛孔中

演說無數諸經典

具足辯才大智慧

覺悟昏醉諸羣生

無量菩薩從空來

執持天鼓如須彌

擊出美妙大音聲

遍滿拘胝億佛刹

普告一切諸人天

娑婆世界雨甘露

方廣大莊嚴經卷第八

音釋

砂鹵

鹵即古切砂鹵切薄之地也

鼈

并列切

鼈鼈

鼈愚袁切鼈徒何切澀立

切不悛恬憺也

吳江居士沈珣捐貲刻此
方廣大莊嚴經卷第八
計字七千一百九十九
六根雪淨三障永清卽生
啓悟妙心世世弘開
道眼龍山釋海瓊對
佛禎四年孟冬月徑山化城寺識

方廣大莊嚴經卷第九

唐中天竺國沙門地婆訶羅奉 詔譯

降魔品第二十一

爾時佛告諸比丘言比丘當知菩薩坐菩提座已作
是思惟我於今者當成正覺魔王波旬居欲界中最
尊最勝應召來此而降伏之復有欲界諸天及魔波
旬所有眷屬久積善業當得見我師子遊戲發阿耨
多羅三藐三菩提心作是念已放眉間白毫相光其
光名爲降伏魔怨遍照三千大千世界傍耀魔宮魔
王波旬於光明中聞如是偈

世有最勝清淨人	經歷多時修行滿
是彼釋種捨王位	今現坐於菩提場
汝身稱有大勇猛	當往樹下共相校
其人已達於彼岸	既自能度當度他
應滅三惡悉無餘	令彼人天轉充滿
若使得證菩提已	不久空虛汝境界
愚癡黑暗瞋恚伴	悉當銷散盡無餘
彼定廣開甘露門	汝等今者爲何計

佛告諸比丘時魔波旬聞是偈已復於夢中見三十二不祥之相一者見其宮殿悉皆黑暗二者見其宮

中沙礫塵土處處飛揚三者見其宮殿破壞而生荆棘糞穢盈滿四者自見驚怖不安東西馳走五者自見寶冠墮落頭髮解散六者見其園中樹木無有華果七者自見頭破腦流於地八者見其自心熱惱九者見其園中樹木枝葉枯落十者見其池井皆竭十一者見其宮中鸚鵡舍利迦陵頻伽共命諸鳥羽翮摧殘十二者見其宮中鐘鼓琴瑟簫笛箜篌種種樂器悉皆斷壞委擲於地十三者見其親族憂惱舉手拍頭悵然而立十四者自見其身墜墮牀下損傷頭面十五者見其諸子有威力者詣菩提場頂禮菩薩

十六者見其諸女悲哭懊惱十七者自見其身衣服垢膩十八者自見其身羸瘦憔悴頭塗塵土十九者見其樓閣牕牖悉皆崩摧二十者見其軍將鬼神夜叉羅刹鳩槃荼等悉皆刎首狼藉委地二十一者見其珠寶瓔珞爲火所燒二十二者見欲界四大天王釋提桓因乃至他化自在諸天向菩薩前住立瞻仰二十三者見其自身對敵鬪戰拔刃不出二十四者見其自身可惡復出惡聲二十五者見其左右及已眷屬皆悉背逆捨之而去二十六者見吉祥瓶皆悉破壞二十七者見那羅天唱不祥音二十八者見歡

喜神稱不歡喜二十九者見虛空中黑暗煙霧處處彌滿三十者見護宮神舉聲大哭三十一者見自在之處咸不自在三十二者自見其宮震動不安佛告諸比丘魔王波旬從夢寤已遍體戰慄心懷恐懼召其大臣而語之曰我聞空中聲言釋種太子出家學道苦行六年坐菩提座當成正覺其道若成必空我境汝等軍衆宜往其所而摧伏之卽說偈言

汝當率領大兵衆

菩提樹下制沙門

諸君如能愛敬我

與彼戰鬪速令去

彼志方空我境界

使爲緣覺及聲聞

若不滅之令永斷

世間成佛無休已

爾時魔王主兵大臣諫於波旬而說頌曰

大王所領四天主

及以八部諸龍神

欲色諸天隨梵釋

皆悉頂禮歸依彼

王之諸子勝智者

勇力世間無等倫

王軍滿八十由旬

夜叉羅刹并諸鬼

雖復近王居左右

恒常敬彼無過人

皆悉合掌生尊重

私以香華而奉獻

我親如斯事相已

定知菩薩勝王軍

王之兵衆所居處

鴝鷓野干爲怪響

菩提樹下甚清淨

善禽瑞獸迭和音

如是吉相彼定強

我觀菩薩誰能勝

又王軍衆所住處

常雨沙磔及塵埃

菩提樹下聖所居

天雨香華悉盈積

王軍所處地高下

砂磔瓦石皆充滿

菩提樹下坦然平

復以七寶而嚴飾

若見如斯前相已

有智之者定須還

如是莊嚴悉周遍

菩薩必當成正覺

大王若不從臣諫

如夢所見終不虛

大王不可犯仙人

宜且收兵還本處

古昔有王觸仙故 呪禁一國悉成灰
過去有王名淨德 違忤羅闍大仙意
令彼彌年遭亢旱 叢林稼穡咸不登
王豈不聞韋陀論 三十二相必成佛
眉間光明白毫相 普照十方諸佛國
況復如王此軍衆 彼豈不能降伏之
無見頂相過極天 諸天畢竟無能覩
行當成彼微妙果 世間未聞令得聞
須彌及以諸山等 皆悉稽首菩提樹
施戒忍進禪定慧 歷劫以來修習成

而能獨坐破王軍

皆是熏修善根力

佛告諸比丘是時波旬聞彼大臣如是偈已其心悶
亂復召千子其五百子清白之部在魔王右歸依菩
薩其五百子冥黑之部在魔王左贊助魔王於是波
旬告語諸子汝等宜應一心籌量以何方計能摧伏
彼右面魔子名曰導師於波旬前而說偈言

睡龍醉象師子王

三獸暴猛猶難觸

況復有斯禪定力

誰能犯彼大牟尼

左面魔子名曰惡慧亦向波旬而說偈言

我若視人人心破

我今看樹樹亦摧

怒目所向無全者

如值伺命終難活

右面魔子名曰美音復向波旬而說偈言

人是不堅何足破

樹稱危脆任能摧

縱汝瞋目須彌崩

何能舉眼瞻菩薩

設使善浮過大海

復能一氣吸滄溟

如是之事自可爲

無能懷惡觀菩薩

左面魔子名曰百臂復向波旬而說偈言

我今一身有百臂

一一皆能放百箭

大王但去不假憂

如此沙門何足害

右面魔子名曰妙覺復向波旬而說偈言

縱汝一毛成一臂

一一皆能放百箭

汝自以此爲殊勝

豈損菩薩之一毛

牟尼定力出世慈

毒火兵刃無能害

執持刀仗圖爲惡

散在空中盡成萃

雖復天人阿修羅

夜叉羅刹有大力

終爲忍辱之所制

能令威勢成羸劣

左面魔子名曰嚴威復向波旬而說偈言

我今能入比丘身

爲火焚燒盡令滅

譬如山火焚枯木

一切叢林悉無餘

右面魔子名曰善目復向波旬而說偈言

世界須彌可燒盡

金剛之慧實難焚

山移海竭大地銷

日月從空皆墮落

利益衆生坐道樹

未證菩提終不移

左面魔子名曰傲慢復向波旬而說偈言

我今住此以手摩

日月宮殿盡令碎

又能吸彼四大海

於中所有皆空竭

當擲沙門於海外

大王勿以此爲憂

不假兵衆降伏之

我獨能令彼銷滅

今當摧折菩提樹

并取沙門擲十方

右面魔子名曰有信復向波旬而說偈言

假使力碎三千界

如是大力滿恒沙

不動菩薩之一毛

何足能傷智慧者

左面魔子名曰可怖復向波旬而說偈言

如此沙門不足畏

彼無朋黨而獨居

今當恐之走十方

大王兵強何以怖

右面魔子名一緣慧復向波旬而說偈言

日月師子寧有兵

輪王威勢不假衆

一切菩薩無軍旅

一身一念破魔軍

左面魔子名曰求惡復向波旬而說偈言

惟願大王莫愁惱

我今不持諸噐仗

以鼻卷取彼沙門

於是撲之令碎滅

右面魔子名功德莊嚴復向波旬而說偈言

其人神力甚堅固

如那羅延不可壞

況持忍辱而爲鎧

勤行精進以爲力

以三解脫爲所乘

復以智慧爲調御

菩薩由斯福德力

必能摧伏我魔軍

左面魔子名曰不退復向波旬而說偈言

譬如激矢自不歸

山火從風定難止

霹靂金剛必無返

未摧釋子終不還

右面魔子名曰樂法復向波旬而說偈言

激矢中石不復前

烈火遇水必銷滅

霹靂至地竟何去

若見菩薩當自歸

大王乍可畫虛空

或使衆生心作一

或能將繩繫日月

如此之事皆可爲

惟有菩薩坐菩提

大王不可而傾動

左面魔子名不寂靜復向波旬而說偈言

我眼有毒若使看

須彌崩倒渤海竭

當知沙門及道樹

纔視之時盡成灰

右面魔子名一切利成復向波旬而說偈言

假使以彼三千界

其中盡成於猛毒

功德之藏若視之

能令衆毒爲無毒

諸毒豈復過三毒

三毒無累其身心

菩薩本自同虛空

大王慎勿輕而往

左面魔子名曰憍著復向波旬而說偈言

莊飾萬億諸天女

鼓奏百千妙絃歌

誘之將入自在宮

恣欲令其永貪著

大王由是得自在

惟願勿以此爲憂

右面魔子名曰法慧復向波旬而說偈言

彼所樂者非非法

惟有解脫及諸禪

爲衆生故樂行慈

於爾五欲無貪著

左面魔子名旃陀羅復向波旬而說偈言

大王不聞諸子言

其聲哮吼皆雄裂

弁有勇健迅捷力

疾往於彼滅沙門

右面魔子名師子吼復向波旬而說偈言

野干羣鳴大澤中

祇爲未聞師子吼

若使一聞師子吼

自當奔馳走十方

如是一切無智魔

未聞人中師子吼

徒自競辯無休止

若使聞已皆銷滅

左面魔子名曰惡思復向波旬而說偈言

豈可不見吾軍衆

我有惡思能速成

若非世間無智者 何不速起而奔走

右面魔子名曰善思復向波旬而說偈言

彼非無知乏勢力 汝自凡愚闕勝能

汝今未悉彼善權 彼當以智降伏汝

我等魔子恒沙衆 如是雄勇遍三千

不動菩薩之一毛 豈獨惡思能致損

無能於彼生惡念 應當尊重起淨心

是卽三界爲法王 汝宜退還勿戰鬪

佛告諸比丘魔王爾時又命諸女作如是言汝等諸女可共往彼菩提樹下誘此釋子壞其淨行於是魔

女詣菩提樹在菩薩前綺言妖姿三十二種媚惑菩薩一者揚眉不語二者褰裳前進三者低顏含笑四者更相戲弄五者如有戀慕六者互相瞻視七者掩歛脣口八者媚眼斜眄九者嫵嫵細視十者更相謁拜十一以衣覆頭十二遞相拈搯十三側耳伴聽十四迎前躑躅十五露現髀脛十六或現胷臆十七念憶昔時恩愛戲笑眠寢之事而示欲相十八或如對鏡自矜姿態十九動轉遺光二十年喜乍悲二十一或起或坐二十二或時作氣似不可干二十三塗香芬烈二十四手執瓔珞二十五或覆藏項領二十六

示如幽閑二十七前却而行瞻顧菩薩二十八開目
閉目如有所察二十九廻步直往佯如不見三十嗟
歎欲事三十一美目諦視三十二顧步流眄有如是
等媚惑因緣復以歌詠言詞嬌固菩薩而說頌曰

初春和暖好時節

衆草林木盡敷榮

丈夫爲樂宜及時

一棄盛年難可再

仁雖端正美顏色

世間五欲亦難求

對斯勝境可歡娛

何爲樂彼菩提法

我等諸女受天報

其身微妙咸可觀

如是天身不可求

仁今果報宜應受

諸仙見我猶生染

況復人能無染心

修彼禪定竟何爲

菩提之法甚懸遠

爾時菩薩聞彼妖惑之言心生哀愍卽以妙偈化其

魔女

我觀五欲多過患

由是煩惱失神通

譬如火坑及毒瘡

衆生赴之而不覺

我又已離諸煩惱

自心覺已方覺他

世間五欲燒衆生

猶如猛火焚乾草

亦如燄幻無有實

亦如泡沫不久停

如彼嬰孩戲糞中

如彼愚人觸蛇首

一切皆無有實法

是身虛妄從業生

四大五蘊假合成

筋骨相纏而暫有

智者誰應耽著此

凡夫迷故生欲心

如是諸幻我已知

是故於中不貪著

欲求畢竟自在樂

今當於此證菩提

我已解脫於世間

如空中風難可繫

爾時菩薩身如融金面如滿月深心寂定如須彌山
安處不動猶如明珠無有瑕疵如日初出照於天下
猶如蓮華不染淤泥心無所著亦無增損是時魔女
復以柔輒言詞白菩薩言仁者道德尊重天人所敬

應有給侍天遣我來供養仁者我等年少色如優鉢
羅華願得晨夜與寢親昵左右菩薩報言汝昔有福
今得天身不念無常造斯幻惑形體雖好而心不端
譬如畫瓶盛諸穢毒行當自壞何足可矜汝為不善
自忘其本當墮三惡道中欲脫甚難汝等故來亂人
善事革囊盛糞非清淨物而來何為去吾不喜其諸
魔女媚惑菩薩既不能得即以建尼迦華及詹波華
散菩薩上右遶三匝作禮而去歸魔王所告魔王言
大王我等昔來未曾見有如是之士於欲界中觀我
姿容而心不動我為媚惑能竭人意譬如旱苗見日

煨枯亦如春酥置於日下自然銷融今此丈夫何緣
乃爾惟願大王莫與此人共爲嫌隙卽說偈言

其身猶如蓮華藏 其面猶如清淨月

其光猶如猛火焰 其色猶如紫金山

百千生中修正行 所有誓願皆成就

自度生死能度他 救濟衆生無懈倦

善哉願王莫瞋彼 天上人間最尊勝

眼目清淨如蓮華 熙怡微笑無貪著

須彌崩壞日月落 其人不可而傾動

佛告諸比丘是時白部魔子導師啓其父言菩薩清

淨超過三界神通道力無有能當諸天龍神咸共稱讚必非大王所能摧屈不煩造惡自招禍患於是波旬告其子言咄汝愚小智慧淺劣未曾見我神通道力導師復言大王我實無知智慧淺劣不願大王與彼釋子共爲怨對也所以者何若有衆生以惡心來欲害於彼不以爲恨復有衆生以善心來供養於彼不以爲欣處此二間心生平等大王假使有人能畫虛空作衆色像未足爲難手捧須彌而以遊行亦未爲難假使有人浮度大海亦未爲難繫四方風亦未爲難欲令一切衆生同作一心亦未爲難欲害菩薩

甚爲難也是時魔王波旬不受子諫詣菩提樹告菩薩言汝應速起離於此處必定當得轉輪聖王王四天下爲大地主汝可不憶往昔諸仙記汝當作轉輪聖王汝若起受轉輪王位作自在主威德無上如法理國統領一切今此曠野甚可怖畏獨無伴侶恐害汝身速當還宮恣受五欲菩提難得徒自勞形作是語已默然而住爾時菩薩語波旬言汝今不應作如此說我意不樂五欲之事故捨四方及以七寶波旬譬如有人既吐食已豈復更能取而食之我今已捨如是果報必定證得無上菩提盡於生老病死之患

波旬我今已坐金剛之座當證菩提汝宜速去於是波旬瞋目發憤向菩薩言汝今何故獨坐於此豈不見我夜叉軍衆卽拔利劍來就菩薩作如是言我當以劍斬截於汝速疾起去勿復安坐爾時菩薩語波旬言假使世間一切衆生盡如汝身悉持刀仗來害於我我終不起離於此座波旬寧以四大海水及此大地移於餘處日月星辰從空墮墜須彌山王可令傾倒而我是身終不可移時魔波旬聞是語已惡心轉熾發憤嗔吼其聲如雷語諸夜叉汝等速宜擊諸山石將諸弓弩刀劍輪槊干戈斧鉞矛積鈎戟種種

器仗喚諸毒龍擬放黑雲雷電霹靂是時夜又大將
統率自部夜叉羅刹毗舍遮鬼鳩槃荼等變化其形
作種種像復嚴四兵象馬車步或似阿修羅迦樓羅
摩睺羅伽無量百千萬億種類一身能現多身或畜
頭人身或人頭畜身或復無頭有身或有半面或有
半身或有二頭一身或有一身三頭或復一身多頭
或復無面有頭或復有面無頭或復無面而有三頭
或復多頭而無有面或復多面而無有頭或復無眼
或惟一眼二眼三眼乃至多眼或復無耳或惟一耳
二耳三耳乃至多耳或復無手或惟一手二手三手

乃至多手或復無足或惟一足二足三足乃至多足
或有全身惟現骸骨或頭現髑髏身肉肥滿或惟頭
有肉身是骸骨或身體長大羸瘦無肚或復纖長其
腹橫大或長脚大膝牙爪鋒利或大面傍出或頭在
胷前或脣垂至地或上褰覆面或身出黑煙或口吐
猛燄或血肉枯竭皮骨相連或身出膿血更相飲吮
或自截支節繚亂委擲或眼目角睷或口面喎斜或
舌形廣大或縮如礪石或持人頭或執死人手足骨
肉肝膽腸胃而噉食之或執毒蛇而食或以蛇纏頸
或手擎髑髏或著髑髏之鬘或復面色全赤全白全

青全黃或有半黃半青半白半赤或作煙熏之色或作死灰之色或復身毛如針或毛出火燄或張目閉目或口吐白沫或於身上現百千面一一面狀甚可怖畏或從眼耳鼻口出諸黑蛇而噉食之或飲融銅或吞鐵丸或刎手足肘膝而行或身放煙燄象頭戴山或被髮露形或衣青黃赤白之服或著師子虎狼蛇豹之皮或頭上火然瞋目奮怒交橫衝擊遍滿虛空及在地上形狀變異不可勝載是諸天鬼或布黑雲雷電霹靂或雨沙土瓦石或擎大山或放猛火或吐毒蛇或有怒爪或有揮劍或有彎弓或有舞槊或

有揮鉞或搖動脣頷或有張口欲噬或哭或笑或飛或走或隱或顯哮吼叫呼惡聲震裂如是兵衆無量無邊百千萬億塼塞填咽菩提樹邊煙燄鬱蒸狂風衝怒震動山嶽蕩覆河海天地掩色星辰無光魔軍集時其夜正半是時無量淨居天衆作如是言菩薩今者證大菩提復有天言魔衆熾盛由此或能損害菩薩爾時菩薩報彼天言我今不久當破魔軍悉令退散猶如猛風吹微細華於是端坐正念不動觀諸魔軍如童子戲魔益忿怒轉增戰力菩薩慈悲令舉石者不能勝舉其勝舉者又不墮落揮刀擲劍停在

空中或有墮地悉皆碎折惡龍吐毒變成香風沙礫
瓦石雨雹亂下皆悉化爲拘物頭華所有彎弓射菩
薩者其箭著弦皆不得發或有發者停住空中於其
鏃上皆生蓮華火勢猛熾化爲五色拘物頭華爾時
波旬猶故瞋忿毒心不止拔劍前趨語菩薩言汝釋
比丘若安此坐不速起者吾自殺汝於是東西馳走
欲近菩薩不能前進是時魔王長子前抱其父作如
是言大王今者會自不能殺彼沙門徒生惡念必招
罪咎魔不受諫向菩薩走是時淨居天子在虛空中
語波旬言汝不自量欲害菩薩終不能得猶如猛風
不能傾動須彌山王卽向波旬而說偈言

地水火風性	可違堅濕煖	菩薩志牢固
終無退轉時	在昔發弘誓	永離諸煩惱
於彼生死病	當作大醫王	人多墮邪路
方開正見眼	衆生處黑暗	將然智慧燈
欲濟生死海	能爲作船楫	此是大聖主
方開解脫門	忍辱爲柯幹	信進爲華葉
生諸大法果	而汝不應毀	汝今有癡縛
彼已得解脫	當破汝煩惱	勿爲障礙因
莫復於此人	而生于惡念	無量劫習法

終
不屬
其
四

經
卷九
七
四九

今者皆圓滿 還如昔諸佛 於此證菩提

佛告諸比丘爾時菩提樹神以十六種言詞毀訾魔王淨居諸天以無量妙音讚歎菩薩是時魔王瞋猶不解作如是言今此比丘得度彼岸當教無量無邊衆生遠離我境更勵魔衆驅逼菩薩而不能得爾時菩薩語魔王言魔王波旬汝當諦聽我今於此斷汝怨讎滅汝惡業除汝嫉妬成就阿耨多羅三藐三菩提汝宜迴心生大歡喜復告波旬汝以微善今獲天報我於往昔無量劫來修習聖行今者當得阿耨多羅三藐三菩提時魔波旬語菩薩言我昔修善汝所能知汝之累德誰信汝者爾時菩薩徐舉右手以指大地而說偈言

諸物依何得生長 大地能爲平等因 此應與我作證明 汝今當觀如實說

爾時地神形體微妙以種種真珠瓔珞莊嚴其身於菩薩前從地涌出曲躬恭敬捧七寶瓶盛滿香華以用供養白菩薩言我爲證明菩薩往昔於無量劫修習聖道今得成佛然我此地金剛之齋餘方悉轉此地不動作是語時三千大千世界六種震動出大音聲有十八相爾時魔衆皆悉退散潰亂失據顛倒狼

藉縱橫而走先時所變雜類之體不能復形魔王是時神氣挫恧無復威勢聞大地聲心生惶怖悶絕頓躡時有地神卽以冷水灑魔王上而告之言汝魔波旬速疾起去此處當有種種兵仗欲來害汝爾時魔王長子於菩薩前頭面禮足作如是言大聖願聽我父發露懺悔凡愚淺劣猶如嬰兒無有智慧將諸魔衆恐怖大聖我先諮諫不受我語今乞大聖恕亮我父惟願大聖速證阿耨多羅三藐三菩提爾時大梵天王釋提桓因無數天子塽塞虛空咸見菩薩破魔軍衆皆大歡喜作天妓樂雨天曼陀羅華摩訶曼陀羅華曼殊沙華摩訶曼殊沙華優鉢羅華拘物頭華波頭摩華芬陀利華以天栴檀細末之香散菩薩上各以偈頌稱讚菩薩是時魔王波旬與其眷屬退散而去還其自宮

成正覺品第二十二

佛告諸比丘爾時菩薩降伏魔怨滅其毒刺建立法幢初離欲惡有覺有觀離生喜樂入初禪內靜一心滅覺觀定生喜樂入第二禪離喜受聖人說住於捨有念有想身受樂入第三禪離憂喜捨苦樂念清淨入第四禪爾時菩薩住於正定其心清白光明無滌

離隨煩惱柔輒調和無有搖動至初夜分得智得明
攝持一心獲天眼通菩薩卽以天眼觀察一切衆生
死此生彼好色惡色勝劣貴賤隨業而往皆悉了知
是諸衆生緣身語意造諸惡業誹謗聖人邪見業故
身壞命終便生惡趣菩薩復觀見諸衆生緣身語意
造諸善業正見業故身壞命終便生天上於中夜分
攝持一心證得憶念過去宿命智通觀過去自他所
受生事皆悉了知一生二生乃至十生百生千生萬
生億生百億生千億生乃至照過無量百千那由他
拘胝數生乃至成劫壞劫無量無邊成劫壞劫皆悉

憶知一一住處若名若姓若色相若飲食若苦樂若
受生若死歿所有色相住處事業若自若他皆悉了
知菩薩作是念言一切衆生住於生老病死苦蘊邊際
中不能覺悟云何令彼了知生老病死苦蘊邊際作
是思惟此老病死從何而有卽時能知因生故有以
有生故老病死有如是生者復因何有卽時能知因
有故有如是生者復因何有卽時能知因取故有如
是取者復因何有卽時能知因愛故有如是愛者復
因何有卽時能知因受故有如是受者復因何有卽
時能知因觸故有如是觸者復因何有卽時能知因

六處有如是六處復因何有卽時能知因名色有如是名色復因何有卽時能知因識故有如是識者復因何有卽時能知因行故有如是行者復因何有卽時能知因無明有爾時菩薩旣知無明因行行因識識因名色名色因六處六處因觸觸因受受因愛愛因取取因有有因生生因老老死憂悲苦惱相因而生復更思惟因何無故老死無因何滅故老死滅卽時能知無明滅故卽行滅行滅故卽識滅識滅故卽名色滅名色滅故卽六處滅六處滅故卽觸滅觸滅故卽受滅受滅故卽愛滅愛滅故卽取滅取滅故卽有

滅有滅故卽生滅生滅故卽老死滅老死滅故卽憂悲苦惱滅復更思惟此是無明此無明因此無明滅此滅無明道更無有餘此是行此是行因此是行滅此是滅行道此是識此是識因此是識滅此是滅識道此是名色此是名色因此是名色滅此是滅名色道此是六處此是六處因此是六處滅此是滅六處道此是觸此是觸因此是觸滅此是滅觸道此是受道此是受因此是受滅此是滅受道此是愛此是愛因此是愛滅此是滅愛道此是取此是取因此是取滅此是滅取道此是有此是有因此是有滅此是滅有

道此是生此是生因此是生滅此是滅生道此是老死此是老死因此是老死滅此是滅老死之道此是憂悲苦惱如是大苦蘊生乃至滅如是應知此是苦此是集此是苦集滅此是滅苦集道應如是知佛告諸比丘菩薩於後夜分明星出時佛世尊調御丈夫聖智所應知所應得所應悟所應見所應證彼一切一念相應慧證阿耨多羅三藐三菩提成等正覺具足三明諸比丘是時諸天衆中無量天子作如是言我等應散香華供養如來復有天子曾見先佛成正覺時卽作是言汝等未可散華如來當現瑞相往昔

諸佛成正覺時皆現瑞相諸比丘如來知彼天子思見瑞相上昇虛空高七多羅樹如佛所證以偈頌曰
煩惱悉已斷 諸漏皆空竭 更不復受生

是名盡苦際

爾時彼諸天子心生歡喜以微妙天華遍散佛上當於是時香華彌布積至于膝如來遠離無明黑暗及愛見網竭煩惱河拔除毒刺解諸纏縛摧壞魔幢建立勝旛能善安處諸衆生界記莈衆生觀察根性知其病本施甘露藥爲大醫王令諸衆生皆得度脫安置涅槃寂靜之樂住如來藏結解脫繒入智慧城同

諸如來清淨法界佛告諸比丘一切如來見我成道
皆悉讚言善哉善哉咸以寶蓋而覆於我其諸寶蓋
合成一蓋遍覆十方三千大千世界於寶蓋中出妙
光明其光明網遍照無量無邊世界彼世界中諸菩
薩衆讚佛功德而說偈言

如彼波頭摩 從地而涌出 開敷甚清淨

不爲淤泥染 起大慈悲心 如雲遍充滿

當雨大法雨 潤洽於衆生 能令諸善芽

一切皆增長 堪受教法者 成就解脫果

爾時諸天以偈頌曰

人中師子降衆魔 諸定現前證甘露

獲得三明及十力 威神振動遍十方

在昔諸來菩薩衆 爲愛法故供養佛

卽從座起禮佛足 讚歎如來作是言

世尊得無疲勞耶 我等親見摧魔衆

善哉丈夫三界尊 當雨無邊大法雨

十方諸佛皆施蓋 復出迦陵微妙音

如我所得淨菩提 仁者所證亦如是

佛告諸比丘欲界諸天女等見於如來坐菩提座獲

一切智大願滿足降伏魔怨建立勝幢爲大醫王善

療衆病如師子王無諸怖畏清淨離垢得一切智具足三明超越四流持一法蓋覆護三界稱婆羅門遠離諸垢稱爲比丘除無明藏稱爲沙門離諸不善稱知足者斷煩惱故稱勇猛者能壞魔幢稱大力者猶如寶洲一切法寶充滿其中時諸天女卽說偈言

於此菩提樹王下

降伏一切大魔軍

安住不動如須彌

身心堅固無驚畏

尊於多劫修布施

故得一切皆圓滿

尊於多劫修戒行

映蔽釋梵諸天衆

尊於多劫行忍辱

故得身相真金色

尊於多劫勤精進

故得降伏衆魔怨

尊於多劫修禪定

故獲如斯勝供養

尊於歷劫習多聞

速證無上大菩提

尊能降伏於蘊魔

死魔煩惱及天魔

一切諸魔皆斷滅

是故今者無憂惱

天中之天爲最尊

三界人天所供養

由是有種福田者

所得之福無失壞

眉間毫相極光明

普照十方諸國土

掩蔽世間諸日月

一切衆生蒙饒益

如來身色甚端嚴

相好容顏及清淨

堪爲三界應供者 普利一切諸羣生
目淨遍觀於十方 普見衆生身業事
耳淨遍聞於一切 天人言音佛法聲
廣長舌相演妙音 求解脫者聞甘露
魔軍興害不驚懼 天人供養無喜愠
摧壞魔怨不加力 但以慈心降伏之
無染無著無諸過 身心安隱不傾動
今有無上天人師 一切衆生蒙善利
逮聞正法當信受 願速如尊成正覺
佛告諸比丘如來於菩提樹下初成正覺現佛神通

遊戲自在不可勝載若欲說者窮劫不盡爾時世尊
略說偈言

普變一切地 平正猶如掌 涌出妙蓮華
一一皆千葉 無量諸天衆 各雨衆妙華
復於世尊前 合掌而瞻仰 世尊初成佛
作種種神通 須彌諸山王 草木叢林等
一切皆稽首 頂禮菩提座 此是佛世尊
現神通遊戲 身放百千種 光明照十方
逮三惡衆生 息苦獲安樂 是時八難處
無有一衆生 懷貪瞋癡等 一切諸煩惱

此是師子王 大神通遊戲 日月摩尼火

電等諸光明 由佛放光明 蔽之皆不現

諸天人世間 無能見佛頂 坐於師子座

作遊戲神通 佛以指按地 卽時六種動

降伏魔軍衆 如制兜羅綿 魔王懷憂惱

以杖而畫地 此是佛世尊 遊戲大神通

方廣大莊嚴經卷第九

音釋

嫫嫫 嫫烏莖切 嫫忙好貌 爪刺也 躑躅 躑蘇協切 躑達協切 躑躅

行髀 髀禮切 股也 脰 胡定切 脰腓腸也 奮 力益切 昵 尼質切 近也 鉞 王月切 大

斧積 子算切 鋌也 喎 口淮切 口不正也 縮 所六切 斂也 疆 居良切 期 初力切

也 遇也 鋌 矢鏑也

吳江居士沈珣損贊刻此 計字入千七百零四
方廣大莊嚴經卷第九 箇 該銀四兩三錢五分二厘 伏願
六根 雪淨三障 水清卽生啟悟妙心 世世弘開
道眼 龍山釋海瓊對
崇禎四年仲冬月徑山化城寺識

方廣大莊嚴經卷第十

唐中天竺國沙門地婆訶羅奉 詔譯

讚歎品第二十三

爾時佛告諸比丘時淨居天子以天妙香華遍散佛
上如佛世尊真實功德以偈讚曰

衆生煩惱暗	智慧能銷除	如來所以出
爲世光明者	降伏諸魔軍	功德皆圓滿
當雨大法雨	以善洽羣生	世間最勝人
智力無逾者	處世無染著	猶如淨蓮華
衆生在長夜	煩惱病纏縛	佛爲大醫王

療之令得愈 尊今出於世 八難咸空寂
一切人天等 遇佛蒙安樂 若有覩見此
人中勝丈夫 經於百劫中 不墮諸惡趣
若有得聞佛 微妙甚深法 速除煩惱患
苦蘊亦皆盡 當得殊勝果 解脫涅槃樂
於諸世間中 得爲應供者 若有勸供養
亦獲大福利 當得勝妙果 乃至於涅槃
佛告諸比丘淨居天子讚如來已合掌恭敬於一面
立是時遍光天子復以種種微妙香華塗香末香燒
香散華幢幡寶蓋供養如來圍遶三匝合掌向佛以

偈讚曰

牟尼深智聲和美 獲得無上大菩提
於諸聲中最第一 是故我等今敬禮
於諸世間起慈故 爲作燈明作依止
能拔衆生諸毒箭 復爲世間大醫王
尊昔值遇然燈佛 發大慈心潤一切
尊如世間淨蓮華 不爲三界淤泥染
其心堅固無能沮 高廣難動如須彌
又如金剛不可壞 亦如舍秋淨滿月
佛告諸比丘遍光天子讚如來已合掌恭敬於一面

五時梵衆天子以無量摩尼莊嚴寶網覆菩提道
場供養世尊頂禮佛足右遶三匝以偈讚曰

世尊能持明智光 及持三十二勝相

念慧功德皆圓滿 離諸結使諸過惡

清淨無垢斷三毒 是故我等今敬禮

名稱普聞證三明 施諸衆生三解脫

清諸濁穢心調伏 起大慈悲利世間

三業寂靜出於世 蠲除二疑無染著

爲諸世間行苦行 以四聖諦化衆生

勤修善行超諸行 自得度已當度彼

魔王將諸魔衆來 尊以慈悲悉降伏

已得甘露菩提道 是故我等咸歸命

佛告諸比丘梵衆天子如是種種讚歎佛已退住一
面是時右面魔王子清白之部至世尊所以衆妙寶
蓋奉上如來以偈讚曰

我自見如來 端坐菩提座 魔軍極熾盛

超然不驚悸 而於一念頃 降伏悉無餘

既有如是德 我今稽首禮 一切皆圓滿

無上大牟尼 魔衆如恒沙 本不能傾動

尊爲菩提故 無量劫行檀 捨施妻子等

法華分五品經卷下

身肉及手足 一切皆無吝 故得勝莊嚴

尊發廣大願 得成無上道 當度諸羣生

定慧為甲冑 淨法為船楫 意樂圓滿已

方度諸眾生 我以歡喜心 讚佛諸功德

願我於來世 得成無上道 又以此功德

降伏眾魔怨 速證一切智

佛告諸比丘清白魔子說如是偈讚歎佛已頂禮如

來恭敬圍遶卽住一面是時復有他化自在天王與

無數天子恭敬圍遶來至佛所將妙閻浮檀金天華

散如來上以偈讚曰

如來所說皆真實 無有覆藏無雜亂

遠離癡冥及罪垢 證得甘露大菩提

光明遍照於十方 是故我今稽首禮

世尊慈悲於一切 善別諸根摧外道

智慧殊勝十力者 能顯眾生微妙行

身處虛空現神變 猶如履地無呈礙

見彼生死廣大愛 知惟妄苦而棄之

當隨天人諸意業 教化皆令得解脫

利益十方如日光 復於三界猶如眼

為諸世間作依止 其心曾不生貪著

遊戲神通得自在

而於世間無與等

佛告諸比丘他化自在天王讚歎佛已與諸天衆頂禮圍遶却住一面是時化樂天王與諸天衆恭敬圍遶來至佛所以種種華鬘珍寶繒綵供養如來以偈讚曰

如來智慧光

滅盡於三垢

煩惱皆已斷

吉祥悉成就

世間諸衆生

執著於邪慢

尊今攝取之

致於甘露道

是故出世間

天人所供養

能除煩惱病

說爲大醫王

日月摩尼火

帝釋梵王等

若於世尊前

其光悉不現

智慧所照燭

是處咸吉祥

一切皆希有

故我今頂禮

世尊知實義

亦知虛妄法

於此二法中

無非如實說

言詞甚微妙

心意極調柔

爲天人導師

故我今頂禮

尊有大智慧

覺悟諸羣生

三明八解脫

能除彼三毒

善識衆生根

堪受不堪受

各隨其意樂

故我今頂禮

佛告諸比丘化樂天王說是偈已與諸天衆頂禮佛足却住一面是時兜率天王與諸天衆恭敬圍遶來詣佛所以種種天妙衣服珠玕寶蓋以覆佛上說偈

讚曰

往到兜率宮 廣說清淨法 遺教今猶在
諸天咸戀慕 如是功德海 爲世作明燈
見者無厭足 故我今頂禮 尊於彼天沒
八難皆銷盡 而坐菩提場 世間獲安樂
佛爲衆生故 起大菩提心 今已降魔怨
得成無上道 請速度未度 轉于大法輪
佛告諸比丘兜率天王說是偈已頂禮佛足退坐一
面是時夜摩天王與諸天衆恭敬圍遶來詣佛所以
種種香華塗香末香幢旛寶蓋供養於佛以偈讚曰

佛爲無上士 世間誰與等 戒定慧解脫
故我今頂禮 我觀諸天衆 於此菩提場
以妙寶臺閣 供養於尊者 無有餘人天
堪受如斯供 佛爲世間出 長時苦行已
降伏魔軍衆 得成無上道 滅除無明暗
智光照十方 與世爲法眼 利益於一切
設於無量劫 讚歎佛世尊 一毛孔功德
猶尚不能盡 名聞遍十方 故我今頂禮
佛告諸比丘夜摩天王讚歎佛已與諸天衆恭敬圍
遶頂禮佛足却住一面是時釋提桓因與三十三天

及諸天衆恭敬圍遶來詣佛所以種種寶幢旛蓋香
華衣服供養佛已頂禮如來以偈讚曰

如來功德甚清淨 身心不動若須彌

智慧光明照十方 名稱普聞於一切

世尊往昔於多劫 供養無量諸如來

故得降魔成正覺 堪受人天勝供養

尊是多聞定慧者 開彼無上智法眼

我今歸依釋勝幢 一切世間大法主

尊爲菩提於多劫 廣行無量諸苦行

慈悲喜捨及方便 精進智慧大梵福

已得如是等功德 今復具足十力果

我覩佛坐菩提時 魔王軍衆欲加害

諸天或有憂懼者 如來身心不驚動

世尊以手垂下時 魔衆於是皆退散

在昔諸佛成正覺 尊今得道亦如是

福智一切皆無異 是爲人天應供者

佛告諸比丘釋提桓因如是等偈讚佛已頭面禮足
却住一面是時四大天王與諸天姪女皆持層波華
婆利師等種種香華奏天妓樂來詣佛所供養佛已
說偈讚曰

如來美音聲 能悅一切意 善行精進戒
心淨常微笑 令衆生愛樂 故我今頂禮
以彼微妙言 除衆生煩惱 能與無量樂
離罪心清淨 獲得無漏智 世間無與比
平等而不動 猶如須彌山 示現於世間
如蓮華出水

佛告諸比丘四天王讚歎佛已頂禮圍遶却住一面
是時虛空諸天亦以種種香華寶蓋幢幡鈴網彌覆
虛空又出半身各持種種寶珠瓔珞供養如來以偈
讚曰

我常處虛空 善惡心皆覩 惟有如來身
清淨無諸過 又見菩薩衆 持種種寶臺
遍於虛空中 其數無有量 又見菩薩衆
供養於如來 散彼微妙華 積滿大千界
又見菩薩衆 將無量供具 華鬘諸瓔珞
傘蓋及耳璫 華香極盈滿 悉皆無雜亂
如流歸大海 雲集遍虛空 如來受彼供
一切心平等

佛告諸比丘虛空天衆供養佛已頂禮圍遶却住一
面是時地神供養佛故淨掃其地灑以香水散以名

華遍菩提場皆悉清淨又以寶幔彌覆其上卽以偈
頌讚歎如來

如來坐是大千界

此爲堅固金剛座

假使身肉盡乾銷

未得菩提終不起

如來不以神通力

我此所居當碎裂

見此諸來菩薩衆

我等今者咸安隱

世尊此地經行故

三千世界並蒙光

佛光所至皆是塔

何況身居此成道

我所統領諸土地

企願世尊之所用

是諸佛子及聲聞

并所說法之功德

願令一切衆生等

皆登無上佛菩提

佛告諸比丘地神說此偈已頂禮佛足合掌恭敬却
住一面

商人蒙記品第二十四

佛告諸比丘世尊初成正覺無量諸天皆悉稱讚如
來功德爾時世尊觀菩提樹王目不暫捨禪悅爲食
無餘食想不起于座經於七日欲界無量諸天子等
捧十千寶瓶盛滿香水來詣佛所復有色界無量諸
天子亦捧十千寶瓶盛滿香水來詣佛所洗浴如來
并洗菩提之樹爾時如來洗浴竟復有無數天龍夜

又乾闥婆阿修羅緊那羅摩睺羅伽等競取如來澡
浴之水以自灑身皆發阿耨多羅三藐三菩提心時
諸天子浴如來已俱還天宮所將餘水香氣不滅惟
聞佛香不聞餘香心生歡喜得未曾有皆於阿耨多
羅三藐三菩提得不退轉時有天子名曰普華從座
而起頂禮佛足白佛言世尊世尊住何三昧於七日
中結跏趺坐身心不動諸比丘我於彼時告普華天
子言如來以喜悅三昧爲食而住由此定力於七日
中結跏趺坐是時普華天子卽於佛前而說偈言
世尊足有千輻輪 猶如蓮華甚清淨

恒爲諸天寶冠接

是故我今稽首禮

爾時天子禮佛已

重說伽他而讚揚

爲欲除彼天人疑

歡喜合掌而前問

如來降生於釋氏

令彼釋種皆歡喜

能滅三毒一切疑

願解天人之所惑

何故十力成正覺

於七日中觀樹王

人中師子青蓮眸

觀樹跏趺而不動

一切諸佛皆如是

爲獨世尊觀樹王

面貌端嚴無二言

齒白齊密口香潔

請爲利益天人故

令生歡喜如實說

爾時如來告天子
猶如世法登王位
如是諸佛爲法王
又如猛將制勝已
如是諸佛降衆魔
三毒煩惱及我慢
一切煩惱有漏因
無漏智火從斯起
我於此處以智刀
正知蘊體皆不實

汝所問者今略說
亦於七日忌遷移
順俗七日無移動
便卽思惟所降衆
七日踟躕而不起
此等皆能損衆生
我於是處皆除斷
焚燒三毒悉無餘
決除生死堅牢網
祇由無始妄惑生

我我所執二無明
諸障稠林四顛倒
妄覺爲鬘從想生
六十五種無明險
十六放逸十八界
二十重塵皆遠離
我於此處以精進
證獲如來五百吼
九十八使諸隨眠
我以智慧而爲火

并及邪見皆銷滅
善根智火咸燒盡
獲得菩提悉捐棄
四十不善三十垢
二十五有悉無餘
二十八種世間物
如是一切悉超過
并得百千圓滿法
罪樹枝葉將根本
於此焚燒悉無餘

愛疑積集如瀑河

諸見之入常盈滿

我於此處以智日

威光曝之使空竭

邪偽諂曲慳嫉等

如是過患煩惱林

我今於此以智火

焚燒一切悉令滅

誹謗凡聖生諸罪

根本能令墮惡趣

我以智藥而投之

令彼吐盡無有餘

又我於此處

獲定慧眾德

憂悲苦惱眾

除盡無有餘

又我於此處

獲得真實理

諸結我慢箭

拔之無有餘

又我於此處

以智慧利刀

斷截我我所

生死之根本

亦如彼帝釋

破壞修羅眾

又我於此處

得清淨智眼

而諸眾生等

癡瞽之所覆

我以智慧藥

洗之令得除

又我於此處

以解脫冷水

於彼境界木

滅除貪火煙

又我於此處

以大精進風

除滅煩惱雲

及以分別電

又我於此處

獲得慈三昧

諸大功德藏

降伏眾魔軍

又我於此處

獲得無願定

諸大功德藏

斷一切煩惱

又我於此處

獲得於空定

諸大功德藏

斷一切分別

又我於此處

獲得無相定

諸大功德藏 滅除於戲論 又我於此處
獲得三解脫 神通智慧刀 決除生死網
又我永斷彼 無常作常想 於苦作樂想
無我作我想 我以精進力 度越生死海
觸壞諸愛網 猶如摩竭魚 我於此覺悟
一切貪瞋等 猶如大火聚 燒蒸諸飛蛾
自我於長夜 無量無邊劫 劬勞生死中
流轉無休已 今者得止息 無憂亦無懼
我所覺悟者 外道不能覺 是甘露句義
能除憂惱等 我入無畏城 除諸蘊界處

愛等皆滅盡 不復受後身 我爲菩提故
於無量億劫 廣行衆善行 施身肉手足
功德皆圓滿 是故於此處 獲得勝甘露
無上大菩提 同諸佛如來 所證真實法
隨諸衆生類 分別而演說 我今亦復然
得如是妙法 能於一剎那 證知諸世間
因緣和合生 空寂無所有 如乾闥婆城
如虛空陽燄 我所得法眼 普見無邊刹
猶如於掌中 視菴摩勒果 我所得三昧
一切皆通達 憶思無量劫 如從夢中寤

世間諸天人 爲顛倒想燒 我今於此處
如實而能了 我於無量劫 求無上菩提
修行於大慈 緣修慈心故 降伏於魔衆
我於無量劫 修行於大悲 緣修悲心故
滅除諸惱患 我於無量劫 修行於大喜
緣修喜心故 證於無上道 我於無量劫
求無上菩提 修行於大捨 緣修捨心故
證得甘露法 我適於魔前 發如是誓言
若不得佛道 終不解此坐 我以金剛智
滅除無明等 獲得十種力 今故解斯坐

未得今悉得 諸漏皆已盡 魔軍悉破散
今故解斯坐 五蓋門盡破 三愛芽悉除
是故於今者 方解跏趺坐 爾時勝丈夫
從金剛座起 復坐於寶座 受諸天澡浴
諸天以寶瓶 滿中盛香水 與佛天中天
澡浴身體已 於是諸天衆 并諸婁女等
擊奏天妓樂 以申於供養 汝諸天子等
應當如是知 我故七日中 不起於此座
佛告諸比丘如來何故 不起于
座爲居此處斷除無始無終生老病死故於七日觀

樹不起至第二七日周而經行三千大千世界以爲
邊際至第三七日觀菩提場目不暫捨亦爲居此斷
除生死得阿耨多羅三藐三菩提至第四七日如來
隨近經行以大海爲邊際爾時魔王至世尊所作如
是言世尊無量劫來精勤苦行方得成佛大般涅槃
今正是時惟願如來入於涅槃唯願善逝入於涅槃
佛言波旬我本發願爲欲利益諸衆生故求大菩提
經無量劫勤苦累德一切衆生於我法中未獲義利
云何邀我入於涅槃又於世間三寶未具衆生未調
未現神通未說妙法無量菩薩未發阿耨多羅三藐

三菩提心云何令我入於涅槃爾時魔王聞是語已
退坐一面以杖畫地作是念言此欲界中於今已去
非我所有心生憂惱是時魔王三女見父愁苦白其
父言

大王何所爲	心生極憂苦	今惱大王者
請說是何人	我當以欲牽	如繩制於象
令其生染著	將歸自在宮	
爾時魔王說偈報其女言		
世間離染人	貪境不能制	以彼超過欲
是故我憂惱		

0 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

此諸魔女如來爲菩薩時已作妖姿擾亂菩薩種種
幻惑無能得便女人貪染煩惱深重於是三女更變
其形一爲童女之形一爲少婦之形一爲中婦之形
來至佛所爾時世尊以神通力令彼三女皆成老母
於是三女還至父所而說偈言

王說離欲人

貪境不能染

我復爲變化

惑亂彼沙門

人有見我者

欲盛便嘔血

今現微妙質

不動於彼心

仍以大神通

化我爲老母

願王以威力

令得如本形

爾時魔王報諸女言我不見有若天若人能制佛者

汝可自往懺悔前罪彼攝神力方令汝等復本形耳
於是魔女至如來所而說偈言

我等無智慧

幻惑於如來

不知田非田

未識善不善

我今及生悔

冀得罪銷滅

唯願慈悲力

令復於本形

爾時如來以慈悲故卽攝神通令彼魔女還復如本
於第五七日住目真隣陀龍王所居之處是時寒風
霖雨七日不霽龍王心念恐畏風雨上損如來出其
自宮前詣佛所以身衛佛纏遶七帀以頭爲蓋蔽覆
佛上四方復有無量龍王皆來護佛龍身委積如須

彌山是諸龍等蒙佛威光身心安樂得未曾有過七日已風雨止息諸龍王等頂禮佛足右遶三匝還其本宮爾時世尊於第六七日往尼俱陀樹下近尼連河是處多諸外道彼外道衆皆來親覲慰問世尊七日風雨得無愁惱安樂住耶爾時世尊以偈答曰
寂靜而知足 思惟而證法 饒益諸衆生
慈悲於一切 遠離衆罪垢 不著於世間
永斷我慢心 是最爲安樂
爾時世尊於第七日至多演林中在一樹下結跏趺坐觀察衆生爲生老病死之所逼迫高聲唱言

世間諸衆生 恒爲五欲燒 應常思捨愛

愛故便增盛

佛告諸比丘時北天竺國兄弟二人爲衆商之主一名帝履富婆一名婆履智慧明達極閑世法姿性調柔善能將導興販貿易息利尤多以五百乘車載其珍寶還歸本國是諸商侶有二調牛一名善生一號名稱巧識前路能知安危示以優鉢羅華不勞杖捶餘牛不濟方乃用之行至乳林路甚平正牛足拒地輪轅摧折是時五百乘車躓於路傍二牛爲道亦不得進加諸杖捶亦不能前時諸商人心懷恐懼共相

謂言二牛不行前塗必有可怖之事卽遣馬騎執持
噐仗前路而巡彼使還已白商主言我行前路無諸
險難何爲二牛亦不能前時護林神忽現其形語商
人言汝諸商人勿懷恐懼汝於長夜流轉生死今得
大利所以者何有佛世尊出現於世初成正覺住此
林中不食已來四十九日汝等應將種種飲食而以
上之時二調牛便向佛行而諸商人隨牛而往行路
不遠遙觀如來三十二相八十種好身光赫然如日
初出既見佛已咸生希有恭敬之心皆作是言此爲
梵王爲是帝釋爲是四天王爲是日月天爲是山神

爲是河神世尊爾時微舉袈裟示彼商人商人見已
卽知如來是出家人心生歡喜各相謂言出家之法
非時不食宜應辦諸美味酥蜜甘蔗乳糜之屬及時
奉施諸商人等營辦種種飲食美味至如來前右遶
三匝却住一面作如是言世尊哀愍我故受是微供
佛告諸比丘如來爾時將欲受彼商人之食作是思
惟過去諸佛皆悉持鉢我今當以何噐而受斯食作
是念已時四天王各持金鉢奉上如來作如是言唯
願世尊用我此鉢受商人食憐愍我故令於長夜獲
大安樂爾時世尊告四天王言出家之法不合受汝

如足金鉢乃至展轉奉七寶鉢皆悉不受是時北方毗沙門天王告餘天王言我念昔者有青身天將四石鉢來與我等復有一天名曰遍光來白我言慎勿用此石鉢宜應供養而作塔想何以故未來有佛出興於世名釋迦牟尼當以此鉢奉上彼佛爾時毗沙門天王語餘天王言欲施石鉢今正是時時四天王各還自宮與諸眷屬持彼石鉢盛滿天華以香塗之奏諸天樂供養石鉢來詣佛所各各以鉢奉上如來而白佛言世尊唯願如來哀受我等所獻石鉢受商人食令我長夜獲大安樂得成法器憐愍我故爾時世尊作是念言四大天王以淨信心而施我鉢然我不合受持四鉢若唯受一不受餘三而彼三王必生嫌恨是故我今總受四王所獻之鉢爾時世尊受北方毗沙門天王鉢而說偈言

汝奉善逝鉢 當得上乘器 我今受汝施

令汝具念慧

爾時世尊受提頭賴吒天王鉢而說偈言

以鉢施如來 念慧得增長 生生受快樂

速證佛菩提

爾時世尊受毗樓博叉天王鉢而說偈言

我以清淨心 受汝清淨鉢 令汝得清淨
人天所供養

爾時世尊受毗樓勒叉天王鉢而說偈言

如來戒無瑕 汝施無瑕鉢 汝心無瑕故
得報亦無瑕

爾時世尊受四天王鉢已如是次第相重安置右手
按之合成一器四際分明如來爾時憶念過去而說
偈言

我昔以華盛滿鉢 奉施無量諸如來
是故今者四天王 施我堅牢清淨鉢

佛告諸比丘時彼商衆驅大羣牛循路而行於晨朝
時牧人擎乳凡所擎者化爲醍醐心生希有速將醍
醐來白商主今所擎乳不知何故悉爲醍醐爲是吉
祥爲是不祥我今未決商衆之中有婆羅門懷貪愛
故云是不祥應作大施商主遠祖已生梵世是時現
身作婆羅門於商衆中說是偈言

汝等往昔發弘誓 如來若證菩提已
我當以食奉獻佛 受我食已轉法輪
今者如來成正覺 汝之所願亦滿足
世尊應受汝美食 當轉無上大法輪

汝今聲乳得醍醐

由此大仙之威力

好辰善宿吉祥兆

是故一切皆吉祥

梵天演說此偈已

還隱其形返天上

佛告諸比丘時諸商人聞此偈已皆大歡喜即取醍醐選上秬米煮以爲糜和好香蜜盛以栴檀之鉢詣多演林奉上如來白佛言世尊唯願哀愍受我此食爾時世尊受商人食已持彼栴檀之鉢擲致空中其鉢栴檀一分價直百千珍寶時有梵天名曰善梵接栴檀鉢還於梵宮起塔供養其塔至今諸天香華供養不絕爾時世尊呪願商人而說偈言

汝等所向皆吉祥

一切財寶悉充滿

吉祥遍汝左右手

總汝身形是吉祥

所求財寶自然至

以吉祥鬘爲首飾

日月星宿諸天等

帝釋四王皆擁護

所去之處旣吉祥

廻還亦復獲安樂

以此施食之功德

當來得成無上道

名爲未度三瞞佛

商人蒙記心歡喜

佛告諸比丘如來最初爲二商王及諸商人而授記
劫時諸商人聞授記已得未曾有皆悉合掌作如是
言我從今者歸依如來

大梵天王勸請品第二十五
佛告諸比丘如來初成正覺住多演林中獨坐一處
入深禪定觀察世間作是思惟我證甚深微妙之法
最極寂靜難見難悟非分別思量之所能解唯有諸
佛乃能知之所謂超過五蘊入第一義無處無行體
性清淨不取不捨不可了知非所顯示無爲無作遠
離六境非心所計非言能說不可聽聞非可觀見無
所罣礙離諸攀緣至究竟處空無所得寂靜涅槃若
以此法爲人演說彼等皆悉不能了知唐捐其功無
所利益是故我應默然而住爾時世尊而說偈言

我得甘露無爲法

甚深寂靜離塵垢

一切衆生無能了

是故靜處默然住

此法遠離於言說

猶如虛空無所滌

思惟心意皆不行

若人能知甚希有

此法性離於文字

孰能悟入其義理

於多劫中供養佛

方能得聞生信解

不可說有說非有

非有非無亦復然

我昔無量劫修行

未得究竟無生忍

我於今者得究竟

常觀諸法無生滅

一切諸法本性空

然燈如來授我記

汝於來世成正覺

作佛名號釋迦文

雖於彼時已證法

今我所得方究竟

見諸衆生處生死

不知是法及非法

世間衆生有可度

故起大悲而度之

梵王若來勸請我

我當爲轉微妙法

佛告諸比丘如來說是偈已眉間白毫放大光明遍照三千大千世界爾時娑婆世界主螺髻梵王以佛威神卽知如來默然之旨作是思惟我應往彼勸請如來轉于法輪告諸梵衆作如是言仁者世間衆生善法損減惡法增長何以故如來得阿耨多羅三藐

三菩提默然而住不轉法輪我等宜往勸請如來是時梵王與六十八拘胝梵衆來詣佛所頂禮佛足右遶三匝却住一面而白言世尊世間衆生今當損減何以故如來爲諸衆生求無上覺今得成佛默然而住不轉法輪以是之故衆生損減善哉世尊善哉善逝願爲衆生起哀愍心而轉法輪世尊多有衆生堪能悟入甚深之法惟願世尊轉于法輪爾時大梵天王以偈請曰

如來勝智 最極圓滿 放大光明 普照世界
當以慧日 開於人羣 何故棄之 默然而止

佛以法財 施諸衆生 於百千劫 已曾攝受
世間親者 寧捨衆生 惟願世尊 吹大法螺
擊大法鼓 然大法燈 雨大法雨 建大法幢
將諸衆生 超生死海 煩惱重病 爲療除之
煩惱猛火 令其止息 示無憂惱 涅槃之路
說真實法 開解脫門 令諸生盲 得淨法眼
斷除生老 病死之患 非天非人 亦非帝釋
而能斷除 生死煩惱 我及天衆 勸請如來
轉于法輪 以此勸請 所生功德 同於世尊
轉于法輪 度脫衆生

佛告諸比丘爾時世尊默然而住大梵天王與諸天
衆俱以天栴檀香末及沉水香末供養佛已忽然不
現佛告諸比丘爾時如來爲令世間尊重法故爲令
甚深妙法得開顯故入深禪定觀察世間作是念言
我證甚深微妙之法最極寂靜難見難悟非分別思
量之所能解惟有諸佛乃能知之所謂超過五蘊入
第一義無處無行體性清淨不取不捨不可了知非
所顯示無爲無作遠離六境非心所計非言能說不
可聽聞非可觀見無所罣礙離諸攀緣至究竟處空
無所得寂靜涅槃若以此法爲人演說彼等皆悉不

能了知唐捐其功無所利益是故我應默然而住爾時大梵天王以佛威神復知如來默然之旨往詣釋提桓因所而語之言憍尸迦汝今應知世間衆生處在生死黑暗稠林善法損滅惡法增長何以故如來棄之不轉法輪憍尸迦我等當共往詣佛所勸請如來何以故諸佛如來若不勸請皆悉默然是故今者我與汝等往詣佛所勸請如來轉于法輪爲令世間敬重法故爾時大梵天王及釋提桓因四天王天三十三天夜摩天兜率陀天樂變化天他化自在天梵衆天梵輔天光音天廣果天遍淨天淨居天乃至阿迦尼吒天光明照曜於夜分中至多演林頂禮佛已右遶三匝却住一面爾時釋提桓因合掌向佛卽以偈頌而請如來轉于法輪

世尊降伏諸魔怨

其心清淨如滿月

願爲衆生從定起

以智慧光照世間

釋提桓因說是偈已如來爾時猶故默然螺髻梵王語釋提桓因言憍尸迦不應如是而爲勸請於是大梵天王卽從座起偏袒右肩右膝著地合掌向佛以偈請曰

如來今以降魔怨

智慧光明照一切

世間根熟有堪度 惟願世尊從定起

爾時世尊告梵王言我證甚深微妙之法最極寂靜
難見難悟非分別思惟之所能解唯有諸佛乃能知
之所謂超過五蘊入第一義無處無行體性清淨不
取不捨不可了知非所顯示無爲無作遠離六境非
心所計非言能說不可聽聞非可觀見無所呈礙離
諸攀緣至究竟處空無所得寂靜涅槃若以此法爲
人演說彼等皆悉不能了知然我常思念是二偈頌
我證逆流道 甚深難可見 盲者莫能觀
故默而不說 世間諸衆生 著彼五塵境

不能解我法 是故今默然

爾時梵王帝釋及諸天衆聞如是偈心大憂惱卽於
是處忽然不現佛告諸比丘復於一時大梵天王觀
摩伽陀國多諸外道等於地水火風空橫生計度封
著邪見以爲正道而彼衆生有應度者而知世尊于
今猶固默然復詣佛所頭面禮足圍遶三匝右膝著
地合掌恭敬以偈請曰

摩伽陀國 多諸異道 因邪見故 種種等量

唯願牟尼 爲開甘露 最清淨法 令其得聞

佛所證法 清淨離垢 到于彼岸 無增無減

於三界中 超然特尊 如須彌山 顯于大海
當於衆生 起哀愍心 而救濟之 云何棄捨
如來具足 一切功德 力無畏等 惟願拔濟
苦惱衆生 世間人天 爲煩惱病 之所逼迫
請佛慈悲 而救濟之 唯有如來 爲歸依處
自昔天人 隨逐如來 此等純善 悉求解脫
是若聞法 皆能領受 唯願如來 爲其敷演
故我今者 請大精進 開示妙法 令見正路
譬如大雲 雨於一切 如來法雨 亦復如是
潤洽一切 枯槁衆生 彼諸人等 邪見毒刺

生死稠林 無始流轉 未蒙拔濟 盲無慧目
將墮深坑 唯願導師 開於正道 施其甘露
佛難值遇 如優曇華 唯願度脫 無依止者
如來往昔 發弘誓願 自旣度已 當度衆生
幸以法光 除諸冥暗 唯佛大慈 勿捨本願
如師子吼 如天雷震 爲衆生故 轉于法輪
爾時世尊以佛眼觀見諸衆生上中下根或邪定聚
或正定聚或不定聚比丘譬如有人臨清淨池見彼
池中所有草木或未出水或與水齊或已出水如是
三種分明見之如來觀諸衆生上中下根亦復如是

如來爾時作是思惟我若說法若不說法邪聚衆生
畢竟不知復更思惟我若說法若不說法正聚衆生
皆能了知復更思惟我若說法不定衆生卽能了知
我不說法卽不了知諸比丘如來爾時觀不定聚衆
生起大悲心作如是言我本欲爲此等衆生轉于法
輪故出於世又爲大梵天王請故卽以偈頌告梵王
言

我今爲汝請 當雨於甘露 一切諸世間

天人龍神等 當有淨信者 聽受如是法

爾時大梵天王聞是偈已歡喜踊躍得未曾有頂禮

佛足遶無數帀卽於佛前忽然不現諸比丘爾時地
神告虛空神唱如是言如來今受梵王勸請欲轉法
輪哀愍無量諸衆生故利益無量諸衆生故安樂無
量諸衆生故增長天人損滅惡趣故爲諸衆生得涅
槃故當轉法輪地神作是語已於一念頃虛空神聞
展轉傳至阿迦尼吒天諸比丘爾時有四護菩提樹
天一名愛法二名光明三名樂法四名法行是四天
子頂禮佛足而白佛言世尊當於何處轉于法輪爾
時如來告彼天言我於波羅奈國仙人墮處鹿野苑
中轉正法輪彼天子言世尊此波羅奈鹿野苑中文

物渺少林泉非勝然有無量諸餘城邑土地豐饒人
民殷盛園林池沼清淨可樂何故如來於鹿野苑中
而轉法輪爾時世尊告諸天子言仁者不應作如是
說所以者何我念往昔於此波羅奈城供養六十千
億那由他諸佛如來以要言之九萬一千拘胝諸佛
皆於是處轉正法輪一切甚深微妙之法皆從中出
是故此地常爲天龍夜叉乾闥婆羅刹等之所守護
以是義故如來於彼鹿野苑中而轉法輪

方廣大莊嚴經卷第十

音釋

療

力嚼切治也

貿

莫候切易財也

躓

知義切躓也

吳江居士沈珣損貨刻此
方廣大莊嚴經卷第十
計字九千四百一
一箇該銀四兩七錢零五厘
伏願
六根雪淨三障水清即生啓悟妙心世世弘開
道眼
虞山釋契機對
崇禎四年仲冬月徑山化城寺識

經

方廣大莊嚴經卷第十

五

四十一

方廣大莊嚴經卷第十一

唐中天竺國沙門地婆訶羅奉 詔譯

轉法輪品第二十六之一

爾時佛告諸比丘如來所作已辦棄捨重擔拔煩惱
根淨諸塵垢摧滅外道降伏魔軍入佛甚深微妙之
理已得知見成就十力四無所畏十八不共一切佛
法無不具足五眼清淨觀察世間作是思惟誰應最
初堪受我法根性淳熟易可調柔於所聞義速能開
悟清淨離染薄貪瞋癡於我所說而無忽忘能令示
教不生劬勞若有所聞永無退失作是念已觀彼外

道羅摩之子聰明有智雖具煩惱三垢微薄若聞我
法速能證知彼得非想非非想定常爲弟子演說修
習今在何處以佛眼觀見其命終已經七日時有諸
天頂禮我足而白我言世尊彼人命終經於七日如
來爲菩薩時已能先知如來有大智力其人若不命
終堪受正法復告諸比丘彼羅摩子不聞我法遂便
命終若不命終我當最初爲其說法彼若聞已卽能
證知爾時世尊復作是念誰應最初堪受我法根性
淳熟易可調柔於所聞法速能開悟清淨離染薄貪
瞋癡於我所說而無忽忘能令示教不生劬勞若有

所聞永無退失作是念已觀彼外道阿羅邏仙聰明
有智雖具煩惱三垢微薄若聞我法速能證知今爲
所在以佛眼觀見其命終已經三日又於是時虛空
諸天作如是言彼仙命終經於三日如來爲菩薩時
已能先知如來有大智力其人若不命終堪受正法
復告諸比丘彼阿羅邏不聞我法遂便命終若不命
終我當最初爲其說法彼若聞已卽能證知爾時世
尊復作是念誰應最初堪受我法根性淳熟易可調
柔於所聞法速能開悟清淨離染薄貪瞋癡於我所
說而無忽忘能令示教不生劬勞若有所聞永無退

失作是念已觀見五跋陀羅根性已熟易可調柔於
所聞法必能開悟清淨離染三垢微薄於我所說而
無忽忘能令示教不生劬勞若不於我得聞正法復
當退失我昔苦行之時謹心事我我當最初爲彼五
人轉正法輪彼能了知具足施戒善法圓滿解脫現
前離諸障礙卽以佛眼觀見五跋陀羅在波羅奈鹿
野苑中佛告諸比丘爾時如來作是念已從菩提樹
向迦尸園波羅奈城震動三千大千世界是時伽耶
城傍有一外道名阿字婆遙見世尊卽前問訊在一
面立而白佛言長老瞿曇諸根恬靜端正可愛身色

晃曜如閻浮金及詹波華仁者修何梵行師爲是誰
從誰出家進止威儀安隱乃爾今從何來復何所往
爾時世尊以偈答曰

我本無有師 世無與我等 於法自能覺

證清淨無漏

阿字婆言瞿曇汝自謂是阿羅漢耶爾時世尊重以
偈答

我爲世間 無上導師 當度一切 是真羅漢

阿字婆言瞿曇汝自謂爲覺耶如來答言我於世間
最爲殊勝滅除一切煩惱惡法我爲正覺阿字婆言

長老瞿曇汝於今者爲何所往世尊答曰我今欲往
波羅奈國鹿野苑中爲諸盲冥衆生作大光明而說
偈言

我往波羅奈 於鹿野苑中 爲盲冥衆生

擊甘露法鼓 轉所未曾轉 無上勝法輪

時阿字婆辭佛南行如來北逝經伽耶城城中有龍
名曰善見明日設齋奉請如來如來食訖往盧醯多
婆蘇都村次復至多羅聚落次復經娑羅村如是遊
歷皆爲長者居士奉獻飲食次第而行至恒河邊是
時河水暴集平流彌岸世尊欲度問彼船人答言與

我價直當相濟耳爾時世尊報船人言我無價直船
人言若無價直終不相濟如來爾時飛騰虛空達于
彼岸船人見佛現是神通乃自責言我無所識云何
不度如是聖人心生憂惱悶絕躡地良久乃甦請頻
婆娑羅王具陳所見王聞是事卽勅船人自今已往
沙門求濟勿受價直諸比丘如來至波羅奈城於晨
朝時著衣持鉢入城乞食還至本處飲食訖詣鹿野
苑中時五跋陀羅遙見世尊共相謂言沙門瞿曇放
逸貪著不能持戒欲斷煩惱尋復退墮便失禪定先
修苦行尚無所能何況今日恣受美食安樂而住是

懈怠人明非道器我等今者不須敬問敷置坐處汲水洗足施設飲食一切莫爲隨其自來不應爲起彼若欲坐當指甲座令其就坐唯阿若憍陳如不同衆心爾時世尊漸近五人所居之處是時五人皆自不安如鳥在籠爲火所逼比丘當知世間衆生無有覩佛得安坐者是時五人皆違本要不覺忽然俱起迎佛或有敷置坐具或有汲水洗足或有提履或有持衣皆言善來長老瞿曇請坐勝座爾時世尊坐彼座已五人於前禮拜問訊各在一面而白佛言長老瞿曇面目端正諸根寂靜身相光明如閻浮金及簷波

華瞿曇今者應證出世聖種智耶爾時世尊語五人言汝等不應稱喚如來爲長老也令汝長夜無所利益又語五人我已證得甘露之法我今能知向甘露道我卽是佛具一切智寂靜無漏心得自在汝等須來當示汝法教授於汝汝應聽受如說修行卽於現身得盡諸漏智慧明了解脫而住梵行成就所作皆辦不受後有又告五人汝昔嫌我俱作是言長老瞿曇耽著世樂不堅持戒欲斷煩惱便卽退墮我適近汝各自不安是故當知不得稱呼如來爲長老也五跋陀羅俱白佛言世尊我今願得於佛法中而爲沙

門佛言善來比丘鬚髮自落法服著身便成沙門鬚
髮長短如剃經七日威儀整肅如百臘比丘卽從座
起頂禮佛足懺悔先罪卽於如來爲大師想尊重瞻
仰生歡喜心爾時世尊入池澡浴浴訖復於一處靜
坐思惟過去諸佛當於何座而轉法輪作是念時忽
於是處有千寶座從地涌出如來爾時從本座起恭
敬圍遶初三高座至第四座結跏趺坐時五跋陀羅
頂禮佛足坐於佛前諸比丘爾時世尊放大光明其
光徧照三千大千世界於光明網中而說頌曰

從彼兜率宮 降生龍毗園 梵釋咸承捧

威猛如師子	十方行七步	曾無迷惑心
卽以梵音詞	而作如是唱	我今於一切
爲最尊最勝	捨轉輪王位	當利益衆生
六年苦行已	卽詣菩提座	降伏諸魔軍
疾成無上道	梵釋諸天衆	勸請轉法輪
哀愍諸世間	默然而受請	以堅固願力
向於鹿苑中	仙人所墮處	演說無上法
此法無數劫	修習之所證	汝等樂聞者
速應來聽受	人天身難得	佛出世甚難
聞法起信心	斯人亦復難	汝不生八難

今獲人天身 值佛聞正法 而能有淨信
汝於百千劫 未曾聞正法 今者得值遇
宜應善修習

佛告諸比丘光明網中說如是偈覺悟三千大千世
界一切人天等衆汝可速來今佛世尊轉于法輪諸
天龍等聞是語已從其本宮來詣佛所爾時地神以
神通力令此道場縱廣正等七百由旬種種莊嚴周
徧清淨虛空天神復將種種幢幡寶蓋以爲嚴飾欲
界色界諸天子等將八萬四千寶師子座置道場中
各自請言世尊哀愍我故爲坐此座轉正法輪諸比

丘爾時東西南北四維上下十方刹土無量拘胝諸
菩薩衆宿植德本來至佛所頂禮佛足右遶三匝合
掌恭敬勸請如來轉于法輪十方三千大千世界所
有釋梵護世及餘無量諸天子衆皆悉頂禮佛足右
遶三匝合掌向佛勸請如來轉于法輪是諸衆會咸
作是言唯願世尊利益安樂愍念諸衆生故雨大法
雨建大法幢吹大法螺擊大法鼓佛告諸比丘爾時
會中有一菩薩名曰轉法持衆寶輪備有千輻莊嚴
綺麗不可稱比放于光明又以華鬘寶鈴微妙繒綵
無量寶具以爲嚴飾由是菩薩先願力故感此輪生

供養如來過去諸佛皆有此輪然後轉法時彼菩薩
持是輪寶奉獻如來而說偈言

尊憶過去時 然燈佛授記 當得成正覺

號名曰牟尼 我亦於彼時 發此弘誓願

導師得成佛 當奉此輪寶 一切人天等

及諸菩薩衆 其數無有量 皆爲轉法輪

各以已神力 齋種種供具 寶臺華蓋等

窮劫說不盡 三千大千界 天人阿修羅

諸龍神衆等 咸悉一心請

佛告諸比丘如來於初夜時默然而過於中夜分安

慰大衆令生歡喜至後夜已喚五跋陀羅而告之言
汝等應知出家之人有二種障何等爲二一者心著
欲境而不能離是下劣人無識凡愚非聖所行不應
道理非解脫因非離欲因非神通因非成佛因非涅槃
因二者不正思惟自苦其身而求出離過現未來
皆受苦報比丘汝等當捨如是二邊我今爲汝說於
中道汝應諦聽常勤修習何謂中道正見正思惟正
語正業正命正精進正念正定如是八法名爲中道
佛語諸比丘有四聖諦何等爲四所謂苦諦苦集諦
苦滅諦證苦滅道諦比丘何等名爲苦聖諦所謂生

苦老苦病苦死苦愛別離苦怨憎會苦求不得苦五
盛蘊苦如是名爲苦聖諦何等名爲苦集聖諦所謂
愛取有喜與貪俱希求勝樂如是名爲苦集聖諦何
等名爲苦滅聖諦所謂愛取有喜與貪俱希求勝樂
盡此一切如是名爲苦滅聖諦何等名爲證苦滅聖
道諦卽八聖道所謂正見乃至正定此卽名爲證苦
滅聖道諦復告比丘如是苦法我先不從他聞由善
隨順如理思惟生智生眼生明生遍生慧生光比丘
如是苦集法我先不從他聞由善隨順如理思惟生
智生眼生明生遍生慧生光比丘如是苦集滅法我

先不從他聞由善隨順如理思惟生智生眼生明生
遍生慧生光比丘如是苦滅證道我先不從他聞由
善隨順如理思惟生智生眼生明生遍生慧生光復
告比丘苦應知集應斷滅應證道應修如是四法我
先不從他聞由善隨順如理思惟生智生眼生明生
遍生慧生光復告比丘我已知苦已斷集已證滅已
修道如是四法我先不從他聞由善隨順如理思惟
生智生眼生明生遍生慧生光復告比丘我先未見
四聖諦未得阿耨多羅三藐三菩提時正智未生我
從證見四聖諦法輪已心得解脫慧得解脫不復退

失而以正智得阿耨多羅三藐三菩提我生已盡梵
行已立所作已辦不受後有爾時世尊出梵音聲如
是梵音從無量功德之所成就無量劫來修習真實
不假於師自然而悟發是妙聲語憍陳如等言眼是
無常苦空無我無人無衆生無壽命猶如腐草雜土
爲牆危脆不實如眼耳鼻舌身意亦復如是憍陳如
一切法從因緣生無有體性離常離斷猶如虛空雖
無作者及以受者善惡之法而不敗忘憍陳如色是
無常苦空無我受想行識亦復如是由愛爲水潤漬
因緣衆苦增長若得聖道證見諸法體性皆空卽能

永滅如是衆苦憍陳如由彼分別不正思惟而生無
明更無有餘爲無明因而此分別不至無明復由無
明而生諸行而此無明不至諸行乃至行緣識識緣
名色名色緣六處六處緣觸觸緣受受緣愛愛緣取
取緣有有緣生生緣老死憂悲苦惱如是等爲世間
因更無有餘能爲其因雖生諸法而因不至法竟無
我人衆生壽者捨於此身而至彼蘊如理思惟無所
分別卽滅無明由無明滅卽行滅行滅卽識滅識滅
卽名色滅名色滅卽六處滅六處滅卽觸滅觸滅卽
受滅受滅卽愛滅愛滅卽取滅取滅卽有滅有滅卽

生滅生滅卽老死憂悲苦惱滅若能如是於蘊界處
了悟因緣爾時得成多陀阿伽度阿羅訶三藐三佛
陀如是甚深微妙之法非諸異道所能了悟爾時世
尊爲憍陳如三轉十二行法輪已憍陳如等皆悉了
達諸法因緣漏盡意解成阿羅漢卽於是時三寶出
現婆伽婆爲佛寶三轉十二行法輪爲法寶五跋陀
羅爲僧寶佛轉法輪時六十拘胝欲界諸天八十拘
胝色界諸天八萬四千人皆悉遠塵離垢得法眼淨
佛告諸比丘如來以妙梵之音轉于法輪其聲徧至
十方佛土彼諸如來各聞三轉十二行妙梵之聲咸

見世尊住波羅奈鹿野苑中而轉法輪是時十方諸
佛皆悉默然而不說法彼土菩薩各從座起而白佛
言世尊如來今者何故默然而不說法爾時彼佛告
諸菩薩言汝等應知釋迦如來於無量劫勤苦累德
勇猛精進行菩薩道超過無量菩薩之行於娑婆世
界得阿耨多羅三藐三菩提利益一切起大慈悲轉
于法輪其佛梵音徧至十方無邊刹土我今聞彼說
法之聲是故默然諸菩薩衆聞佛語已皆發阿耨多
羅三藐三菩提心作是誓言願我當來速成佛道以
無漏法眼開悟衆生同於彼佛爾時彌勒菩薩前白

經

大廣度世經卷第二

六一

經

大廣度世經卷第二

七

六一

佛言世尊無量諸來大菩薩衆願聞如來轉于法輪
所有功德唯願世尊略爲宣說法輪之性佛告彌勒
及諸菩薩言善男子法輪甚深不可取故法輪難見
離二邊故法輪難悟離作意及不作意故法輪難知
不可以識識不可以智知故法輪不雜斷除二障方
能證故法輪微妙離諸喻故法輪堅固以金剛智方
能入故法輪難沮無本際故法輪無戲論離攀緣故
法輪不盡無退失故法輪普徧如虛空故彌勒法輪
顯示一切諸法本性寂靜不生不滅無有處所非分
別非不分別到於實相升于彼岸空無相無願無作
體性清淨離諸貪欲會於真如同於法性等于實際
不壞不斷無著無礙善入緣起超過二邊不在中間
無能傾動契於諸佛無功用行不進不退不入不入
而無所得不可言說性唯是一而入諸法是爲不二
非可安立歸第一義入實相法法界平等超過數量
言語路斷心行處滅不可譬喻平等如空不離斷常
不壞緣起究竟寂滅無有變易降伏衆魔摧諸外道
超過生死入佛境界聖智所行辟支所證菩薩所趣
諸佛咨嗟一切如來同有如是無差別法彌勒所轉
法輪體性如是若有如是轉法輪者乃名爲佛名正

徧知名自然悟名法王名導師名大導師名商主名
自在名法自在名轉法名法施主名大施主名善行
名圓滿名意樂滿足名說者名作者名安慰者名安
隱者名勇猛者名戰勝名作光名破暗名持燈名大
醫王名療世間名拔毒刺名離障智名普觀見名普
觀察名普眼名普賢名普光名普門名端嚴名無所
著如大地故名爲平等如須彌山王故名不動成就
諸功德出過世間故名最尊達一切法故名無見頂
出過世間煩惱黑暗故名明燈最極甚深難窮底故
名大海一切菩提分法寶具足故名寶所無繫無著

心解脫故名無滌通達諸法故名不退轉利益衆生
不擇處故名如風焚燒一切煩惱故名如火滌除一
切分別煩惱故名如水平等法界無中無邊無礙神
通慧所行故名如空除一切法障故名住無障智超
過世間眼所行境故名徧一切法界身不滌世間一
切境界故名最勝人名無量智名演說世間師名制
多名出世間名不滌世法名世間勝名世間自在名
世間大名世間依止名到世間彼岸名世間燈名世
間上名世間尊名利益世間名隨順世間名一切世
間了知名世間主名世間應供名大福田名最上名

無等等名無比名常真實名一切法平等住名得道
名示道者名說道者名超過魔境名能摧伏魔名出
生死獲得清涼名離無明黑暗名無疑惑名離煩惱
名離希求名除諸見惑名解脫名清淨名離貪名離
瞋名離癡名盡漏名心淨解脫名智淨解脫名宿命
智名大龍名所作已辦名離重擔名逮得已利名遠
離生死結縛名正智心善解脫名善到一切心自在
彼岸名到施彼岸名到戒彼岸名到忍彼岸名到精
進彼岸名到禪定彼岸名到智慧彼岸名願成就名
住大慈名住大悲名住大喜名住大捨名精勤攝衆

生名得無礙辯名與世間作大依止名大智名念慧
行覺成就名得正念正斷正神足通五根五力菩提
分法奢摩他毗鉢舍那名度生死大海名住彼岸名
住寂靜名得安隱處名得無畏處名摧伏煩惱魔名
丈夫師子名離毛豎怖畏名無垢名知者名得三明
名渡四河持制多故名刹利遠離一切罪垢故名婆
羅門破壞無明藏故名比丘超過深著故名沙門盡
諸漏故名清淨者持十力故名大力者修身語意故
名婆伽婆是法王故名王中之王名轉勝法輪名利
益衆生名不變壞說法名受一切智位名成就七菩

提寶名得一切法寶境界名衆會瞻仰名能調伏未
調伏者名善能與諸菩薩授記名得七淨財名成辦
一切樂名隨一切意悉捨名與一切衆生安樂名持
金剛勝智名普遍眼名見一切法無障礙名普智作
大神通名演大法名一切世間無有厭足名光大清
淨名一切世間親近者名知衆生器名大嚴名有學
無學圍遶名普照名大幢王名徧光明名大光普照
名無雜對諸問難名無分別名光明徧照名甚深難
知難見難解般若波羅蜜光明場名大梵名寂靜威
儀名成就一切勝行名持妙色名見無厭足名諸根

寂靜名資糧圓滿名得調柔名得勝調柔寂靜名諸
根調伏藏名如馴象王名如清淨池具足三十二相
故名永斷一切習氣障具足隨好莊嚴身故名最上
妙色無上丈夫調御士故名四無畏圓滿十八不共
佛法故名天人師成就一切事故名身口意業無譏
嫌成就一切相清淨智故名空住善能了悟諸緣起
性平等故名無相住於一切願求無染著故名無願
住捨離一切境界故名無功用行真如法界虛空相
無相智境界故名如語不虛妄語不異語觀如幻陽
焰所夢水月谷響鏡像故名捨阿蘭若舉足下足調

伏衆生故名行步不空過斷除一切無明煩惱愛故名法城爲涅槃因故名見聞皆益超過欲界故名出淤泥超過色界故名摧魔幢超過無色界故名建智幢是法身智身故名出過一切世間無邊功德寶智華開發成就解脫果故名大樹難值故名優曇華隨心願求皆得圓滿故名摩尼珠王成就諸業行故名手足綢繆於長夜梵行堅固護持不動故名足下有千輻輪衆相莊嚴於長夜如法供養衛護父母尊長及應供者無依怙者爲作依怙不殺命故名手足長於長夜誓不殺演說不殺功德勸諸衆生不殺救護

諸衆生故名手足柔輒於長夜供養父母承事尊上應供之人以酥油潤身自手塗摩歡喜無懈名手足綢繆於長夜善能布施愛語利益同事攝受衆生故名足下安平於長夜恒常增長勝上法故名身毛右旋及以上靡於長夜如來塔所自手修營供養灑掃聞如來法身毛爲豎心生希有復爲衆生演說正法諸聞法者心生希有故名踣如伊尼鹿王於長夜聽聞正法受持讀誦如說修行爲他解說方便善知甚深句義於老病死苦惱衆生爲作依止演說妙法不生輕慢故名陰藏隱密於長夜恭敬沙門婆羅門布

施衣服顯梵行德及顯十善自具慚愧及教他堅固
修行等事故名臂膊長於長夜不惱害衆生身語意
業與慈相應故名身如尼拘陀樹於長夜飲食常自
知量不多不少見病者施種種湯藥於下劣衆生常
生慈悲修理壞塔及營新塔怖畏衆生施其無畏故
名身體柔澤於長夜供養父母師長及應供者以酥
油塗身適其温清澡浴熏香布施上妙室宅衣服飲
食卧具湯藥令得安隱以香水灑掃如來塔廟又以
香華幢幡寶蓋莊嚴佛塔故名真金色於長夜不惱
害衆生常修慈忍勸諸衆生修行十善以金造如來

形像及造塔廟或以金彩圖畫如來及以塔廟或生
金末散佛形像及以塔廟或以幢幡寶蓋莊嚴佛塔
及佛形像或以衣服飲食惠施衆生故名一一毛孔
一一毛生皆悉光澤分明顯現於長夜常親近智者
請問何法是罪何法非罪何法可修何法不可修何
法爲上何法爲中何法爲下擇其善者而修行之及
掃灑佛塔故名七處高於長夜父母及應供沙門婆
羅門可遵崇者皆悉供養貧窮下賤有所希求皆隨
彼意施與衣服飲食卧具湯藥又修園池林井給彼
須者故名身上分如師子於長夜父母及應供處常

能供養恭敬於貧窮下賤心不輕欺常生憐愍在如是等願力堅固不捨棄故名髀骨不現於長夜常省已過不訟彼短永離鬪諍身語意業恒常清淨故名兩肩平滿於長夜在沙門婆羅門生恭敬心迎來送去善解諸教得無所畏有鬪訟者教令不諍又教諸王臣佐及一切衆生令修忠孝修行善業增長佛法故名師子領於長夜隨諸衆生所有樂欲一切施與善言安慰皆令歡喜願力堅固各具四十齒於長夜不兩舌鬪諍有鬪諍處和其兩邊各令歡喜故名齒不踈缺於長夜常修善事遠離惡法常施衆生乳酪

及淨衣服以白土爲泥掃拭佛塔以衆白華供養佛塔具如是等功德故名齒白齊密於長夜所出語言令諸衆生心生喜樂不求他過以平等心勸諸衆生演說正法故名於諸味中得最上味於長夜不惱衆生有病苦者隨其所應而療除之所求美味隨意與之心不生恚故名梵音聲於長夜不妄語不麤獷語不惡語常住慈悲喜捨四梵住處以柔輒音聲爲衆生說法皆生歡喜心故名眼青紺色於長夜在父母師長常生恭敬觀一切衆生猶如一子有來求者恒起慈悲勸諸衆生觀於佛像塔廟故名眼睫如牛王

於長夜心不下劣意常廣大勸諸衆生修無上法遠
離羣感恒常微笑親近善友先言慰喻故名舌廣大
於長夜遠離一切語過恒常讚歎聲聞辟支菩薩如
來及諸法師受持讀誦書寫經典爲人解說如法修
行故名肉髻無能見頂於長夜頂禮父母諸尊沙門
婆羅門以香油塗其足下及爲淨髮一切來者皆以
華鬘繫其頂上故名眉間白毫右旋清淨光明於長
夜恒常開門大施普請衆生隨意所與亦勸衆生行
如是施親近善友恒不捨棄求法重師不憚艱劬心
無懈怠於聲聞緣覺菩薩如來父母師長所以種種

香油然燈及造妙好端正如來形像以妙寶莊嚴又
以白寶安置眉間作如來相好勸諸衆生發菩提心
令修無量諸善行故名得大勢志名成就那羅延力
名成就如來無畏願力名說法不錯亂名覺悟無言
說名願力能令一切衆生隨類各解各無失念名無
異想名如實了知諸衆生心名非擇滅捨名欲行三
昧不斷名精進不退名念不退名智不退名解脫不
退名解脫知見不退名從智出一切身語意業隨智
慧行名過現未來智障無礙名得無礙解脫名善入
衆生之行名如應說法名善能超過一切音聲相彼

岸名善對答一切異類音聲名迦陵頻伽聲名天鼓
聲名天樂聲名地大震動聲名大海王聲名大龍王
聲名大雲聲名隨諸衆生類聲名無著無礙令諸衆
會生歡喜心名梵釋天王之所供養名阿修羅緊那
羅摩睺羅伽歡喜心瞻仰目不暫捨名聲聞衆之所
承事名菩薩衆之所恭敬讚歎名無希求說法名說
一字一句皆不唐捐名說法以時彌勒我今略說如
來功德若廣說者窮劫不盡爾時世尊欲重宣此義
而說偈言

無處無戲論

無生亦無滅

體性空寂靜

轉如是法輪

不出亦不入

無因亦無相

一切法平等

轉如是法輪

如夢幻陽焰

水月及谷響

皆無有自性

轉如是法輪

入諸因緣法

不斷亦不常

遠離諸惡見

轉如是法輪

遠離於有無

非法非非法

本自不生滅

轉如是法輪

實際非實際

真如非真如

示諸法體性

轉如是法輪

眼耳鼻舌身

及意皆不實

體性空無思

轉如是法輪

以如是法輪

覺諸未覺者

一切法體性

我自己覺知

不從他覺悟

名曰自然人	得於法自在	故說為法王
知理知非理	故名為導師	隨應演說法
教化諸羣生	能到於彼岸	故名為教主
為諸迷路者	演說真實法	度之於彼岸
故名無上師	以四攝及智	普攝諸世間
越生死稠林	故名為商王	於法無罣礙
故名法自在	轉於正法輪	故名為法王
名師名持法	名無上法主	亦名大德王
亦名戒願滿	亦名施無畏	亦名示涅槃
亦名能降伏	亦名能自解	亦名能悟心

智慧大光明	普照於一切	破無明黑暗
為世作醫王	能除煩惱病	善拔諸毒箭
名無上導師	有三十二相	具八十種好
身分皆微妙	隨順於衆生	十力四無畏
十八不共法	大乘勝牟尼	具如是威德
無上正法輪	如來勝功德	若欲廣說者
窮劫不能盡	佛智無有邊	廣大如虛空

方廣大莊嚴經卷第十一

音釋

邏即佐薄益切輻方六切鬘莫班切脆此芮切物易斷也

馴詳倫切緲母官切怙胡古切蹲布兗切臍丑凶切

踝胡瓦切腿兩切獠古猛切紺古暗切睫子葉切目直也顰旁毛也

感輦眠真切感子六切輦感愁貌

吳江居士沈珣捐資刻此
方廣大莊嚴經卷第十一
計字七千九百二
十二箇
該銀三兩九錢六分一厘
伏願
六根雪淨
三障永清
卽生啟悟
妙心世世弘開
道眼
龍山釋海瓊對
崇禎四年仲冬月徑山化城寺識

方廣大莊嚴經卷第十二

唐中天竺國沙門地婆訶羅奉 詔譯

轉法輪品第二十六之二

爾時佛告諸比丘如來化五人竟作是念言優樓頻
螺迦葉有大名稱與五百弟子俱國王奉事臣庶宗
仰我當詣彼教以正法卽往尋之迦葉見佛迎前問
訊善安隱不爾時如來報迦葉言無病知足寂滅清
信是爲安隱迦葉請佛日旣將暮唯願沙門幸留於
此隨意所處佛語迦葉欲寄石室止住一宿迦葉言
吾不愛室中有毒龍恐相犯耳乃至三語迦葉報言

任於中止爾時如來洗手足已前入石室敷座而坐
龍便瞋怒身中出煙佛亦出煙龍大瞋怒身中出火
佛亦出火二火俱熾焚燒石室迦葉夜起見室盡然
驚怖歎惜此大沙門端正尊貴不取我語爲火所害
遽令弟子人持一瓶汲水而救所有瓶水悉變爲火
師徒益恐皆言龍火殺是沙門如來爾時以神通力
制伏毒龍置於鉢中明旦持鉢盛龍而出迦葉大喜
怪未曾有今此沙門乃復活耶器中何有見是毒龍
佛告迦葉我以伏之令受禁戒迦葉甚慚顧謂弟子
是大沙門雖有神力不如我得羅漢道也爾時如來

移近迦葉所住之處在一樹下於夜分中四大天王
皆來聽法光明甚盛如大火炬迦葉夜見謂佛事火
明旦白佛言沙門法中亦事火耶佛言不也昨夜四
王下來聽法是其光耳於後帝釋下來聽法其光轉
盛迦葉明日復問沙門亦事火耶佛言不也此是帝
釋來聽法耳於後梵王下來聽法其光益盛迦葉明
日復問沙門亦事火耶佛言不也此是梵王來聽法
耳迦葉及五百弟子人事二火且欲然火火終不著
怪以問師師言此是沙門所爲故也俱來問佛我所
事火然乃不著佛言欲使然耶當令得然火卽然矣

既然後迦葉滅火復不可滅五百弟子相助滅之亦不能滅各自念言復是沙門所爲故也共往問佛火旣得然今不可滅佛言欲使滅耶當令得滅火卽滅矣迦葉白佛言唯願沙門恒住於此共修梵行我願勅家常使供養每以日時請佛俱行詣其家食佛言汝可先去當隨後至迦葉適去佛以神力上忉利天取彼天果東至弗婆提取菴摩勒果南至閻浮界取閻浮果西至拘耶尼取訶梨勒果北至鬱單越取自然粳米盛置鉢中飛空而還先迦葉至坐其牀上迦葉後到問佛沙門從何道來佛語迦葉汝去之後

我往四方及上忉利取是名果及以美飯汝可食之時摩伽陀國國王大臣吏人官屬長者居士婆羅門等當就迦葉爲七日會迦葉念言彼大沙門威德巍巍相好無上衆人見者必當捨我而奉事之寧此沙門七日之中不來我所佛知其念隱而不現七日滿已迦葉念言節會已訖餘饌甚多彼大沙門今若來者我當飯之佛知其意忽然而至迦葉驚喜而問如來七日之中何爲見棄佛言汝先起念是以不現今汝相憶故復來耳爾時迦葉五百弟子將欲祀火俱共破薪各各舉斧皆不得下懼而告師師言是大沙

門所爲故耳卽往問佛我諸弟子向共破薪各各舉斧皆不得下佛言當下應聲卽下旣下之後斧皆著薪而不可舉復來問佛佛言可去自當舉耳應時卽舉尼連禪河遄流箭激佛以神力令水涌起過於人上佛行其下步步生塵迦葉遙望恐佛漂溺卽與弟子乘船救佛見水涌起佛行其下步步生塵迦葉喚佛沙門欲上船不佛言甚善卽於水中從船底入船無穿漏迦葉復言是大沙門神則神矣猶不如我羅漢道也佛語迦葉汝非羅漢何爲貢高自稱羅漢於是迦葉心驚毛戰慚懼稽首今此大聖乃知我心唯

願大聖攝受於我在聖法中而爲沙門佛語迦葉汝旣耆舊多有眷屬又爲國王臣民之所歸敬今欲學道其可自輕宜與弟子更熟詳議迦葉言善哉如聖所教然我內心非不自決且當還與弟子論耳迦葉還來集諸弟子我已信解彼沙門法其所得道是爲真正我今歸趣汝意云何弟子答言我等亦願隨從歸依是時迦葉與諸弟子釋其衣服取事火具悉棄水中俱詣佛所稽首佛足而白佛言我及弟子於聖法中願爲沙門佛言善來比丘鬚髮自落法服著身皆成沙門迦葉二第一名難提二名伽耶各有二百

五十弟子先住水邊見諸梵志衣帔什物事火之具
隨水下流皆悉驚愕恐畏其兄及諸門徒爲人所害
卽與五百弟子泝流而上見兄師徒皆成沙門怪而
問曰兄今耆舊年百二十智慧深遠國內遵崇我意
言兄已證羅漢今棄淨業敦彼沙門其道勝耶迦葉
答言佛道最優其法無上我自昔來未曾見有神通
道力與佛等者其法清淨當度無量能以三事教化
衆生一者道力神通變化二者智慧知他人心中者
善知煩惱應病授藥二弟聞已心生恭敬顧謂弟子
汝意云何五百弟子同聲發言願從師教卽皆稽首

求爲沙門佛言善來比丘鬚髮自落法服著身皆成
沙門爾時如來與千比丘俱往波羅奈國在於林下
爲諸弟子或時變現或時說法或復說戒觀佛威神
莫不欣喜盡成羅漢爾時世尊從波羅奈國與優樓
頻螺迦葉兄弟三人及千羅漢至摩伽陀國時頻婆
娑羅王又聞菩薩得成佛道巨身丈六紫磨金色三
十二相八十種好十號具足已得知見成就五眼證
獲六通梵釋四王皆悉奉事今入我國心甚歡喜吾
本共要成佛相度乃不忽遺從我所願卽勅國內嚴
淨道路王乘寶車大臣百官前後導從千乘萬騎出

城迎佛爾時世尊近王舍城在遮越林於大樹下千
比丘衆圍遶而坐王遙見佛如星中月如日初出既
如帝釋亦似梵王處於天宮儼若金山巍巍超絕王
心歡喜下車步進去五威儀稽首禮佛自稱其號作
如是言久服尊德欽渴積時如來卽以梵音慰問王
言大王四大常安隱不統理人務無乃勞耶王曰蒙
祐幸得安隱爾時頻婆娑羅王及諸臣民咸觀迦葉
於佛邊坐心自念言迦葉耆舊衆仙之宗豈應棄道
作佛弟子爲是佛師爲師佛乎佛知其意卽以偈頌
問迦葉言

汝常祀山川 歸依水火風 日月衆梵天
夙夜勤精進 事來幾何時 其心無懈廢
汝所奉神祇 寧有致福不
爾時迦葉以偈答曰

自念祠祀來 已經八十載 風水火梵天
山川及日月 夙夜常精進 祈心不懈廢
畢竟無所獲 值佛乃得安

說是偈已王及羣臣國中人民乃知迦葉爲佛弟子
佛告迦葉汝起宜應現汝羅漢神通迦葉卽時承佛
教已涌在虛空身上出火身下出水或身上出水其

身不濡或身下出火其身不灼飛行虛空七現七隱
入地如水履水如地穿過須彌無所罣礙於佛前地
西沒東現東沒西現南沒北現北沒南現既變化已
還於佛前長跪叉手而白佛言我是弟子佛是我師
王及臣民重明迦葉是佛弟子爾時世尊告頻婆娑
羅王言大王色是無常苦空無我受想行識亦是無
常苦空無我色如聚沫不可撮摩受如水泡不得久
立行如芭蕉中無有堅想如所夢爲虛妄見識如幻
化從顛倒起三界不實一切無常大王有此國來爲
幾何時王言有此國來七百餘代所領之王盡識以

不答曰知吾父耳佛言世間須臾唯道可恃應修來
福無爲空過大王當知如人生時雖因父母而生其
身不由父母招其果報善惡美醜先業所爲若造諸
善命終之後生天人中十方佛前若造諸惡命終之
後生於地獄餓鬼畜生一切諸法緣合卽生緣散卽
滅大王當知無明緣行行緣識識緣名色名色緣六
處六處緣觸觸緣受受緣愛愛緣取取緣有有緣生
生緣老死憂悲苦惱大王無明滅故則行滅行滅故
則識滅識滅故則名色滅名色滅故則六處滅六處
滅故則觸滅觸滅故則受滅受滅故則愛滅愛滅故

則取滅取滅故則有滅有滅故則生滅生滅故則老死滅老死滅故則憂悲苦惱滅大王十二因緣盡坦然無跡猶如虛空分別本無逮得法忍說是法時八萬四千諸天及人遠塵離垢得法眼淨無央數衆發阿耨多羅三藐三菩提心爾時頻婆娑羅王得法眼淨欣然請佛願受五戒大臣百官國內人民皆悉歸佛亦受五戒既受戒已卽從座起頂禮佛足而白佛言世尊乃能棄捨轉輪王位出家爲道我於昔日輒先奉請若得道時願前見度我於今者宿願成滿幸蒙佛恩得履道跡國務殷繁比更親奉王及羣臣遶

佛三帀辭退而去王至宮已羣臣上賀古昔諸王悉不見佛唯獨大王得值如來王益欣喜復慰羣臣卿等夙福今幸遇佛出興於世因勅後宮妃嬪嫫女及國內人民長修齋戒盡令奉法時摩伽陀國有一長者名迦蘭陀見佛入國未有精舍以好竹園奉上如來前白佛言世尊大慈憐愍一切如父如母能棄世榮今得成佛未有精舍我以竹園奉上如來佛時呪願而爲受之恒與聖衆遊處其內彼時摩伽陀國人民殷盛耽著俗樂喧呼歌舞不捨晝夜佛適入國化以法言齋戒修心皆捨俗樂佛有弟子名舍婆耆入

城分衛威儀有序行步安詳路人見之無不欣悅時
舍利弗見此沙門心自念言我學道久頗知法式未
曾見有如是之人必有異聞威儀乃爾試往問之所
事何道時舍利弗卽問比丘汝師是誰願聞其志爾
時比丘以偈答曰

吾師具相好 三界爲最尊 五陰十二緣

不住於空有 我今年尙少 學業猶未深

不可以言詞 說佛諸功德

說是偈已告舍利弗我所事師天上人中最尊最勝
積功累德不可稱載從兜率天降生闍浮初生之時

能於十方各行七步舉手唱言天上天下唯我最尊
唯我最勝三界苦惱吾當度之釋梵四天咸來供事
佛之功德不可具述時舍利弗聞此語已如從暗中
覩日光明語比丘言善哉善哉吾少好學八歲從師
年甫十六靡不該綜自謂爲達今者得值無上正覺
真爲我師汝所言佛今在何處比丘答言今在迦蘭
陀竹園精舍時舍利弗將諸弟子至如來所稽首禮
足前問訊已而白佛言我處長夜恒履愚迷幸得值
佛願開正路得爲沙門成就禁戒佛言善來比丘鬚
髮自落法服著身便成沙門佛爲說法漏盡意解得

阿羅漢前白佛言世尊我與同學大目犍連要得道時必相開示今欲往彼願承聖旨佛言宜知是時時舍利弗入王舍城訪目犍連遙見目連與諸弟子遊行里巷爾時目連觀舍利弗形狀變改逆而問之有何異見容服乃爾答曰學無常師唯道所在求法積年不遇大聖今者得值身心徧喜故來相求願同法味目連答曰此非小事宜共籌量舍利弗言我昔所行與汝從事汝所學者我悉已知請無復言是時目連告舍利弗言仁者智慧本逾於我今之所教豈相誤耶作是語已隨舍利弗往詣佛所稽首佛足白言

違遠大聖沈沒煩惱今得親奉願爲沙門卽捨澡瓶鹿衣杖具佛言善來鬚髮自落法服著身便成沙門佛爲說法漏盡意解得阿羅漢時舍利弗目犍連及二百五十弟子皆得出家盡成羅漢

爾時輸檀王聞子得道已經六年中心欣喜欽渴彌積語優陀夷言汝今可往請佛還國問訊起居離別已來十有二載夙夜悲感不能自己得一相見還如更生優陀夷受王教已往詣佛所稽首佛足具述王意乃觀諸天梵釋咸來歸命而白佛言願爲沙門佛言善來鬚髮自落法服著身便成沙門得阿羅漢道

爾時世尊作是思惟本與父王要誓成佛爾乃還國
當度父母令得佛道不違本誓卽語優陀夷比丘言
汝宜先往顯示神足作十八變知吾道成弟子尚爾
況佛威德優陀夷奉佛教已飛行而往還到本國於
迦毗羅城上虛空中現十八變王及臣民莫不驚懼
而優陀夷說是偈言

如來甚希有 難可得值遇 勤苦無量劫
哀愍諸衆生 本行菩薩道 今得願滿足
坐於菩提樹 降伏大魔怨 破壞生死因
銷滅諸煩惱 已得成正覺 演說無上法

我本奉王教 出國迎太子 說王愁念久
言詞甚可悲 佛顧本生地 尋當見親族
我時承佛命 將入迦毗羅 辭佛御神通
忽至大王所 變化若干種 譬如淨蓮華
父王見神變 心生大恐懼 借問爲所從
未曾覩是變 太子本棄國 求道度衆生
勤苦無量劫 今乃得成佛 王今勿驚懼
宜應悅豫心 我以度生死 爲王太子使
王時聞子問 淚落如雨星 我自十二年
愁念無窮已 忽聞吉祥至 如人死復甦

我子捨國位	成道名何等	我時答王言
太子經六年	勤苦得成道	號曰天中天
三界最第一	我子在家時	爲造諸時殿
刻雕成續飾	今者何所居	我時答王言
佛得微妙法	所處無不安	常在於樹下
諸天來供養	我子在家時	坐卧敷綖
皆以綺飾成	柔輦而光澤	我時答王言
天帝貢衣服	龍妃獻寶牀	佛心無美惡
未嘗見喜愠	我子在家時	盛饌衆甘美
今所膳御者	施設何等食	我時答王言

持鉢從分衛	福衆無增減	呪願彼施人
世世令安隱	我子在家時	寢卧常使安
絃歌奏清音	爾乃從寐起	我時答王言
禪定非明暗	諸佛無睡眠	帝釋常服膺
梵王來勸助	我子在家時	澡浴以香湯
芬馥滿室中	今用何等香	我時答王言
八解三脫門	澡浴除諸垢	心寂無憂惱
猶如淨虛空	我子在家時	雜香以塗熏
清淨無塵穢	郁烈而香潔	我時答王言
戒定慧解脫	道德以爲香	十方八難處

普熏無不至	我子在家時	四種妙寶牀
重疊敷網縵	卧起而安悅	我時答王言
四禪為牀座	等持心自在	不滌煩惱泥
清淨如蓮華	我子在家時	兵衛甚嚴肅
出入常擁護	目不見諸惡	我時答王言
千二百羅漢	菩薩無央數	俱為弟子眾
左右而恭侍	我子在家時	象馬牛羊車
周旋往四方	隨意而遊觀	我時答王言
五通為驂駕	飛空無壅礙	同見一切心
遊踐超生死	我子在家時	旌旗列羽衛

人執諸兵仗	前後為導從	我時答王言
四等為防護	普濟眾厄難	恩慧仁愛敬
以此為嚴衛	我子在家時	鐘鼓導前路
雜以眾妓樂	觀者每盈衢	我時答王言
道樹成正覺	度五跋陀羅	八萬四千元
皆已得法眼	九十六種道	摧伏而歸命
鳴於不死鼓	其音徹三千	啓授皆明悟
一切咸欣悅	我子王何國	提封為廣狹
所化幾何人	悉當歸伏不	佛領三千界
化導諸羣生	十方不可數	靡不蒙饒益

我子在家時 聽政助吾化 勸導以禮節
奉順莫敢違 佛悟諸法空 捨於四顛倒
無不歸依者 寂靜無爲業 佛法無愛憎
一切皆通達 化及諸衆生 無不蒙饒益
假使有一人 其人無量首 一首無量舌
舌有無窮辯 如此恒沙人 以恒沙劫數
歎佛一功德 猶尙不能盡 況我如螢燭
何能演日光

時輸檀王聞此偈已歎言善哉阿斯陀仙言無虛妄
問優陀夷佛欲來不優陀夷言却後七日如來當至

王聞是語歡喜踊躍語諸大臣吾當迎佛導從儀式
法轉輪王先勅所司平除道路香水灑地懸繒幡蓋
種種嚴飾盡其所宜我當出城四十里外奉迎如來
優陀夷言本承佛教來報大王今請向佛說王之意
欽渴積年願覩如來并及萬姓咸希福祐王言善哉
願速見佛時優陀夷還至佛所稽首佛足而白佛言
世尊王及國人計日度時願得見佛我已告王却後
七日世尊當至爾時如來到七日已與諸弟子整持
衣鉢威儀庠序向迦毗羅城梵釋四王聞佛還國皆
來導從梵王侍右帝釋侍左四王諸天前後導從諸

天龍神華香妓樂而以供養寶幢旛蓋羅列道側天
雨香水以灑於地如來欲行先現瑞相十方世界三
千國土六反震動一切枯樹還生華葉竭涸溪澗自
然流泉王見瑞已勅諸釋種大臣百官嚴持旛蓋燒
香散華作衆妓樂而以迎佛王遙見佛處於大衆如
星中月如日初出如樹開華巨身丈六端嚴熾盛既
見佛已悲喜交集稽首作禮而白佛言世尊離別多
年今得相見大臣百官一切人民皆稽首禮隨佛入
城爾時世尊足踰門閭地爲大動天雨妙華樂器自
鳴盲者得視聾者得聽瘖者得行病者得愈瘕者能

言狂者得正偃者得伸毒害自銷禽獸相和其聲清
亮環珮相觸璀璨流響珍藏自然衆寶出現包匿異
心皆共和合一切衆生無姪怒癡展轉相視如父如
母如兄如弟如子如身地獄休息餓鬼飽滿畜生捨
身當生人天父王親佛巨身丈六紫磨金色如星中
月亦如金山梵釋四王皆悉奉侍見諸比丘曾爲外
道久修苦行形體羸劣親近侍從猶如黑烏在紫金
山不能顯發如來之德便勅國內豪貴釋種顏貌端
正選五百人度爲沙門侍佛左右如金翅鳥在須彌
山如摩尼珠置水精器佛弟難陀亦爲沙門難陀所

使名優波離前白佛言世尊人身難得佛法難遇諸尊貴者皆棄世榮我身卑賤何所貪樂惟佛慈悲願見救度許爲沙門佛言善來比丘鬚髮自落法服著身便成沙門在比丘中隨例而坐難陀後至次第作禮到優波離卽止不禮心自念言是我家僕不當設禮爾時世尊告難陀言佛法如海容納百川四流歸之皆同一味據戒前後不在貴賤四大合故假名爲身於中空寂本無吾我當思聖法勿生僑慢爾時難陀去自貢高執心卑下禮優波離於是大地爲之震動時佛入宮坐於殿上王及臣庶日日供養百種甘

饌佛爲說法度無數衆耶輸陀羅攜羅睺羅年已七歲來至佛所稽首佛足瞻對問訊而白佛言久違侍奉曠廢供養諸釋眷屬皆有疑心太子去國十有二載何從懷孕生羅睺羅佛告父王及諸羣臣耶輸陀羅守節貞白無瑕疵也若不信者今當取證爾時世尊化諸比丘皆悉如佛相好光明等無差異時耶輸陀羅卽以指環與羅睺羅而語之言是汝父者以此與之羅睺羅持取指環直前奉佛王及羣臣咸皆歡喜歎言善哉羅睺羅真是佛子爾時世尊爲王說法卽時得道羣臣萬姓後宮嫔女咸奉戒法淨修梵行

是時國內安靜萬邦來賀

囑累品第二十七

爾時世尊告淨居天難陀蘇難陀等言菩薩始從兜率下生間浮乃至出家降伏魔怨轉于法輪汝等諸天皆悉贊助今復請我利益世間演說如斯大嚴經典菩薩所行如來境界自在神通遊戲之事汝等若能受持讀誦爲他說者我此法眼當得增廣若菩薩乘人聞說此經必大歡喜得未曾有發起堅固精進之心求阿耨多羅三藐三菩提是故汝等福德無量不可稱計若有善男子善女人得聞是經合掌信受

其人當獲八種功德何等爲八一者端正好色二者力勢強盛三者心悟通達四者速得辯才五者獲諸禪定六者智慧明了七者出家殊勝八者眷屬強盛若有善男子善女人願樂欲聞如是等經與說法師敷置高座轉身當得八種坐處何等爲八一者長者坐處二者居士坐處三者輪王坐處四者護世坐處五者帝釋坐處六者梵王坐處七者菩薩得菩提時所坐之處八者如來轉正法輪所坐之處若有善男子善女人得聞是經稱揚讚美是人當得八種淨語何等爲八一者言行相應無違諍故二者所言伏衆

可遵承故三者所言柔輒不麤獷故四者所言和美
攝衆生故五者聲如迦陵頻伽悅樂衆生故六者聲
如殷雷摧伏外道故七者得梵音聲超過世間故八
者得佛音聲應衆生根故若有善男子善女人書寫
此經流通四方其人當得八功德藏何等爲八一者
念藏無忘失故二者慧藏善能分別諸法相故三者
智藏能了諸經義故四者陀羅尼藏所聞皆能持故
五者辯藏能發衆生歡喜心故六者得正法藏守護
佛法故七者善提心藏不斷三寶種故八者修行藏
得無生法忍故若有善男子善女人讀誦此經受持

句義不忘失者其人當得八種圓滿一者施匱滿無
慳悋故二者戒圓滿得願具足故三者多聞圓滿得
無著智故四者奢摩他圓滿一切三昧現前故五者
毗鉢舍那圓滿具足三明故六者福德圓滿具足三
十二相八十種好淨佛土故七者妙智圓滿隨諸衆
生所有意樂得具足故八者大悲圓滿成熟衆生無
勞倦故若有善男子善女人發如是念云何當令一
切衆生入此法門作是念已爲人演說以此善根當
得八種廣大福德何等爲八一者轉輪聖王福德二
者護世天王福德三者帝釋福德四者夜摩天王福

德五者兜率天王福德六者化樂天王福德七者他化自在天王福德八者大梵天王乃至如來所有福德若有善男子善女人聞此經典信心不逆是人當得八種淨心何等爲八一者得大慈心與衆生樂故二者得大悲心拔衆生苦故三者得大喜心滅衆生憂惱故四者得大捨心滅衆生貪恚故五者得四禪心於欲界中心自在故六者得四定心於無色界心自在故七者得五神通往來佛土故八者能斷諸漏得首楞嚴三昧故若國土城邑聚落所在之處有此經卷當知其處離八種畏何等爲八一者離敵國畏

二者離賊盜畏三者離惡獸畏四者離饑饉畏五者離諍訟畏六者離戰鬥畏七者離夜叉畏八者離一切怖畏汝等當知正使如來以戒定慧解脫解脫知見無礙辯才於一劫中日夜常說此經功德亦不能盡若比丘比丘尼優婆塞優婆夷受持讀誦書寫解說當知是人所得功德亦不可盡爾時世尊告彌勒菩薩摩訶薩及大迦葉長老阿難言我於無數百千億劫修習佛道今得成就阿耨多羅三藐三菩提爲欲利益諸衆生故演說此經如是等經付囑於汝汝等受持廣宣流布爾時世尊重說偈言

我以佛眼觀 盡見諸衆生 假使諸衆生
皆如舍利弗 有人於億劫 以種種香華
衣服卧具等 供養如是等 所獲諸功德
不如一日夜 供一辟支佛 假使諸世間
皆如辟支佛 有人於億劫 以種種香華
衣服卧具等 供養如是衆 所獲諸功德
不如以淨心 一稱南無佛 假使諸世間
皆如佛世尊 有人於億劫 以種種香華
衣服卧具等 供養諸如來 所獲諸功德
不如有一人 能於日夜中 讀誦此經典

若人過無數 百千萬億劫 以種種香華
衣服卧具等 供養如前說 無數聲聞衆
一切辟支佛 及彼諸如來 所獲諸功德
不如有一人 受持此經典 乃至四句偈
分別爲他說 我所說諸經 是經爲最勝
一切諸如來 皆從此經出 是經所住處
卽爲有如來 若有書寫持 處處廣流布
卽能演一句 塵劫無窮盡 福慧自莊嚴
盈滿如大海 若聞是經者 應當常修習
功德無有量

佛說此經已彌勒菩薩摩訶薩大迦葉長老阿難淨
居諸天摩醯首羅及諸天龍夜叉乾闥婆阿修羅迦
樓羅緊那羅摩睺羅伽人非人等皆大歡喜信受奉
行

方廣大莊嚴經卷第十二
音釋

據

其據切

道

市緣切

激

吉歷切

波

披爲切

愕

五各切

泡

莫割切

泡

懼

蘇故切

逆

敦

胡弄切

濡

汝朱切

沫

水沫切

泡

莫割切

泡

泡

水

漚也

雕

都聊切

績

胡對切

綻

綻於阮切

綻

綻於阮切

綻

綻於阮切

綻

也

愠

紆問切

芬

敷文切

馥

香氣也

綻

綻於阮切

綻

綻於阮切

綻

綻於阮切

欲

倉合切

駟

御車馬也

也

蹙

彼戟切

足

提挈也

攜

玄圭切

也

也

吳江居士沈珣捐資刻此
方廣大莊嚴經卷第十二
六箇該銀三兩七錢五分
六根雪淨三障水清即生
道眼虞山釋契機對
崇禎四年仲冬月徑山化城寺識



上
二十